

**Xi³ ma³jao²-ni³ xon⁴xi³
pa²stro⁴Pablo
qui³squi³-le⁴cho⁴ta⁴corintios**

Pablo si¹ti²nta³

¹ An³ nia¹³ Pablo, pa²stro⁴-le⁴ Jesucristo,
jo³-s²in² coan³me³-le⁴ Ni³na¹, cao⁴ nts²e³²,
je² Timoteo, to⁴jnco³ ti³chji²-lai²⁴jin⁴ jon² xi³
na⁴xi⁴na³nta¹-le⁴ Ni³na¹ xi³ ti³yo³ ya⁴ Corinto,
cao⁴ nca³ts²i³ cho⁴ta⁴-le⁴ Cristo xi³ tgio¹ ya⁴
nca³qui³jnta² Acaya. ² Ni³na¹ je² N²ai³-na¹ c²oa⁴
je² Nai³-na¹ Jesucristo ca²ta³tsjoa¹-no³ cjoa⁴nta³,
ca²ta³si¹qui³njen³nch²an¹jin³ ni⁴ma⁴-no³.

Ni³na¹ si¹je³con³-na¹ nca³yi³je³ cjoa⁴ñ²ain³-na¹

³ Cjoa⁴nta³ ca²ta³v²ai²-le⁴ je² Ni³na¹-le⁴ c²oa⁴
N²ai³-le⁴ Nai³-na¹ Jesucristo, je² N²ai³ xi³ ts²e⁴
cjoa⁴ma⁴ta³con², c²oa⁴ Ni³na¹ xi³ ts²e⁴ nca³yi³je³
cjoa⁴ni²je³ta³con², ⁴ xi³ si¹je³con³-na¹ nca³yi³je³
cjoa⁴ñ²ain³-na¹, jme¹-ni³ nca³ c²oa⁴-ti⁴ ña¹
coan⁴-si¹ni³na¹ si⁴je³ta³coan³² je² xi³ tgio¹jin³
to⁴jña³-le⁴ cjoa⁴ñ²ain³-ni³ cao⁴ xi³ ti⁴coi³-ni³
cjoa⁴ni²je³ta³con², jo³-s²in² si¹je³con³-na¹ Ni³na¹
nca³ ña¹. ⁵ Jo³-s²in² nca³ ma³ncjin²ya³jin³-
na¹ cjoa⁴ñ²ain³ xi³ ts²e⁴ Cristo, nca³ c²oa⁴-ti⁴
v²a³cao⁴t²a³-na¹, c²oa⁴-ti⁴s²in²ni³ ma³ncjin²ya³jin³-
na¹ cjoa⁴ni²je³ta³con² xi³ to⁴t²a³ts²e⁴ Cristo.
⁶ To⁴nca³ tsa² chja³?ai²⁴-jin⁴ cjoa⁴ñ²ain³,
coi³ xi³ t²a³ts²e⁴ cjoa⁴ni²je³ta³con²-no³ c²oa⁴

cjoa⁴vi³tjo³ntjai²-no³. C'oa⁴ tsa² ma³je³ta³coin²⁴-jin⁴, coi³ xi³ t²a³ts²e⁴ cjoa⁴ni²je³ta³con²-no³, c²oa⁴ cjoa⁴vi³tjo³ntjai²-no³. Je² cjoa⁴ni²je³ta³con²-vi⁴ xi³ si¹xa¹jin³-no³ nca³ jon², c²ia⁴ nca³ jcho¹cjoa⁴-no³ xi³ ti⁴coi³-ni³ cjoa⁴ñ²ain³ xi³ ti³chja³?ai²⁴-jin⁴ nca³ jin⁴-jin⁴. 7 C'oa⁴ je² xi³ cho³ya²-lai⁴jin⁴ xi³ t²a³tsaon⁴ n²ion¹ ti¹jna³, nca⁴ ?ya³qui²xi⁴-jin⁴ nca³ jo³-s²in²nca³ v²a³cao⁴t²a³-no³ je² cjoa⁴ñ²ain³, c²oa⁴-ti⁴s²in²ni³ v²a³cao⁴t²a³-no³ je² cjoa⁴ni²je³ta³con². 8 Nca⁴nts²e³², li²coi³ me³-na³jin⁴ nca³tsi²jchao⁴xi³ t²a³ts²e⁴ cjoa⁴ñ²ain³ xi³ coan³t²ain³-jin⁴ ya⁴ Asia nca³ nqui²sa⁴ tse³ cjoa⁴ñ²ain³ qui³chja³?ai²⁴-jin⁴ cao⁴-ni³ tsa² je² xi³ coan³ qui³jcho¹cjoa⁴-na³jin⁴, sa³nta³ nca³ me³c²ain³-jin⁴. 9 C'oa⁴-s²in² coan³-na³jin⁴ jo³-ni³ tsa² xi³ cjoa⁴vi³ya³ qui³s²e³ne²-le⁴, jme¹-ni³ nca³ tsi² nta³ ?ya³ta³con²-si¹ni³jin⁴ yao³-na⁴jin⁴ xi³ ti⁴jin⁴-ni³jin⁴, to⁴nca³ Ni³na¹ xi³ nta³ ?ya³ta³coin²⁴-jin⁴, xi³ si¹cja³?a¹ya³-le⁴ xi³ c²en³. 10 Je² xi³ tsa³c²a³sje³ntjai²-na³jin⁴ cjoa⁴vi³ya³ xi³ tse³, c²oa⁴ xi³ c²oa⁴sje³ntjai². C'oa⁴ cho³ya²-lai⁴jin⁴ nca³ to⁴jo³ c²oa⁴sje³ntjai²-sa³na³jin⁴. 11 Nca⁴ ti³ncha³cao⁴-na³jin⁴ nca³ jon² nca³ v²e²ts²oa³ntjai²-na³jin⁴, jme¹-ni³ nca³ ncjin² xi³ tsjoa¹-si¹ni³ cjoa⁴nta³ xi³ t²a³tsain⁴-jin⁴, nca³ c²oa⁴-s²in² qui³ts²ai²-na³jin⁴ je² cjoa⁴nta³, nca⁴ ncjin² xi³ tsa³c²e¹ts²oa³ntjai²-na³jin⁴.

Pablo tjin¹-le⁴ cjoa⁴ma⁴ta³con² xi³ t²a³ts²e⁴ cho⁴ta⁴ corintios

12 Ch²a²sje³je³yai³jin⁴ yao³-na⁴jin⁴ t²a³ts²e⁴ cjoa⁴-vi⁴ nca³ je² cjoa⁴fa³?ai³tsjen³-na⁴jin⁴ si¹qui²xi⁴ya³-na³jin⁴ nca³ tsje³-ni¹jin⁴ c²oa⁴ nca³

ña³qui³ cjoa⁴qui²xi⁴-ni¹⁴jin⁴, jo³-s⁷in² qui³tsjoa³-na³jin⁴ Ni³na¹. C⁷oa⁴-s⁷in² tsa³qui³yo³choin³⁴-jin⁴ i⁴ son³⁷nte³, c⁷oa⁴ nqui²sa⁴ tse³ c⁷oa⁴-s⁷in² tsa³qui³yo³jin³cao⁴-lai²⁴jin⁴ nca³ jon², a³li²cao⁴ cjoa⁴chji⁴ne⁴-le⁴ yao³-na⁴jin⁴, to⁴nca³ cao⁴cjoa⁴nta³-le⁴ Ni³na¹. ¹³ Nca⁴ tsi² tsa² chji³-lai²⁴jin⁴ cjoa⁴ xi³ cja⁴⁷ai¹, to⁴je² xi³ v⁷e²xquiao⁴³ a³xo⁴ xi³ c⁷oa⁴-ti⁴ ma³cho⁴ya³-no³. C⁷oa⁴ an³ co³ya²³-le⁴ nca³ sa³⁷nta³ cjoet⁴t²a³ coan⁴cho⁴ya³-no³, ¹⁴ jo³-s⁷in² nca³ je³coan³cho⁴ya³c⁷a³-no³, nca³ jin⁴ ni¹⁴-jin⁴ xi³ ch⁷a⁴sje³je³yao³, c⁷oa⁴-ti⁴s⁷in²ni³ jo³-s⁷in² nca³ jin⁴-jin⁴ ch⁷a⁴sje³je³ya³-lai²⁴jin⁴ c⁷ia⁴ nca³ ni⁴čhjin³-le⁴ Nai³-na¹ Jesús. ¹⁵ C⁷oa⁴ ña³qui³ tjin¹jnco³-le⁴coan³ je²-ve⁴, coan³me³-na³ nca³ ti¹tjon² qui³con³-no³ nca³ jon², jme¹-ni³ nca³ qui³s⁷e³-si¹ni³no³ xi³ coan³jao²c⁷a³-ni³ cjoa⁴nta³. ¹⁶ C⁷oa⁴ coan³me³-na³ nca³ ja²⁷a⁴to³-no³ c⁷ia⁴ nca³ quia³ ya⁴ Macedonia, c⁷oa⁴ nca³ ji³nčhoa³con³ nqui²jnco³c⁷a²-ni³no³ c⁷ia⁴ nca³ ji³nčhoa³-nia³ ya⁴ Macedonia, nca³ qui³cha³ni²ya³ntia⁴²-nao¹³ c⁷ia⁴ nca³ quia³ ya⁴ Judea. ¹⁷ C⁷oa⁴ nca³ coan³me³-na³ nca³ c⁷oa⁴qui³s⁷ian³ je²-vi⁴, a³ to⁴en¹sca¹ xi³ qui³si³čhjen¹³. A³xo⁴ coi³ xi³ si³cja³⁷ai³tsjen³, a³ c⁷oa⁴-s⁷in² si³cja³⁷ai³tsjen³-nia³ jo³-ni³ tsa² cho⁴ta⁴ xi³ to⁴xa¹ cjoan³-ni³, nca³ s⁷e⁴jin³-si¹ni³na³ xi³ jaon³-le⁴ c⁷oa⁴ xi³ mai³-le⁴. ¹⁸ To⁴sa³ Ni³na¹ xi³ cjoa⁴qui²xi⁴ xi³ ti¹ve³ nca³ je² en¹-na⁴jin⁴ xi³ qui³cha²cao⁴-lai²⁴jin⁴ li²coi³ c⁷oa⁴jaon³-le⁴ c⁷oa⁴mai³-le⁴. ¹⁹ Nca⁴ je²?nti¹-le⁴ Ni³na¹, Jesucristo, xi³ an³ cao⁴ Silvano cao⁴ Timoteo qui³no²cjoa⁴ya³jin³-lai²⁴jin⁴ nca³ jon², je²-vi⁴ li²coi³ c⁷oa⁴jaon³-le⁴ c⁷oa⁴mai³-le⁴,

to⁴nca³ jaon³ coan^{3-le⁴} nca³ je². ²⁰ Nca³yi³je³
 jo³ tjin¹ xi³ qui³si³s⁷e³nqui³ Ni³na¹ jaon³ ma³
 t⁷a³ts⁷e⁴, c⁷oa⁴ je² xi³ tso² c⁷oa⁴ca²ta³ma³, c⁷oa⁴ma³
 t⁷a³ts⁷e⁴. Coi³ nca³ ña¹ vi³xoan¹ xi³ t⁷a³ts⁷e⁴
 cjoa⁴je³ya^{3-le⁴} Ni³na¹ c⁷oa⁴ca²ta³ma³. ²¹ C⁷oa⁴ je²
 xi³ si¹n⁷ion¹t⁷a³-na¹ Cristo, jin⁴-jin⁴ cao⁴ jon², c⁷oa⁴
 je² xi³ qui³si³ca³njon³-na¹, je² Ni³na¹. ²² Je² xi³
 c⁷oa⁴-ti⁴ tsa³c⁷e¹choa⁴-na¹, c⁷oa⁴ qui³tsjoa³-na¹ je²
 Espíritu Santo xi³ ti¹jna³jin³ ni⁴ma⁴-na¹ jo³-ni³ xi³
 qui³s⁷e³jna³nqui³. ²³ To⁴nca³ an³ nchja^{23-le⁴} Ni³na¹
 nca³ testigo ma³ t⁷a³ts⁷e⁴ ni⁴ma⁴-na⁴ nca³ c⁷oa⁴-
 s⁷in² tjin¹-na³ cjoa⁴ma⁴ta³con² xi³ t⁷a³tsaon⁴³ nca³
 tsi² ja²²a⁴nqui²ntia³ ya⁴ Corinto. ²⁴ Li²coi³ nca³
 jin⁴-jin⁴ va³te²xo³ma³-lai²⁴jin⁴ je² xi³ ma³cjain¹-no³,
 to⁴nca³ jin⁴ xi³ vi³ncha³cao⁴-lai²⁴jin⁴ xi³ t⁷a³ts⁷e⁴
 cjoa⁴tsjoa³-no³, nca⁴ xi³ t⁷a³ts⁷e⁴ xi³ ma³cjain¹-no³
 n⁷ion¹ ti³yo³-nio³.

2

¹ Je²-vi⁴ xi³ qui³si³cja³⁷ai³tsjen³ nca³ an³, nca³ tsi²
 cjoa²²ai⁴con³ nqui²jnco³c⁷a²-ni³no³ nca³ jon² cao⁴
 cjoa⁴va³. ² Tsa² an³ c⁷oa⁴-s⁷in² si³va³-no³, c⁷ia⁴ ?ya¹-
 ni³ xi³ si⁴²tsjoa³-na³, tsa² tsi² je² xi³ an³ si³va^{3-le⁴}.
³ Ti⁴je²-ni³vi⁴ xi³ qui³squi³-no³, jme¹-ni³ nca³ tsi²
 tse³ cjoa⁴va³ tsjoa¹-si¹ni³na³ je² xi³ tjin¹-ni³le⁴ nca³
 tsjoa¹-na³ cjoa⁴tsjoa³ c⁷ia⁴ nca³ an³ xi³ coi³choa³.
 Tjin¹jnco^{3-le⁴}coan³ xi³ t⁷a³tsaon⁴³ nca³ts⁷io³ nca³
 je² cjoa⁴tsjoa³-na⁴ ti⁴coi³-ni³ xi³ tsaon⁴³ nca³ts⁷io³.
⁴ Nca⁴ qui³squi³-no³ cao⁴ xi³ tse³ nta¹xcoan³ nca³
 cjai¹ tse³ cjoa⁴ñ⁷ain³ cao⁴ cjoa⁴fao¹ xi³ qui³s⁷e^{3-le⁴}
 ni⁴ma⁴-na⁴, a³li²coi³-jin² nca³ c⁷oa⁴-s⁷in² coan⁴va³⁻

no³ nca³ jon², to⁴nca³ jme¹-ni³ nca³ jcha⁴-si¹nio³ jo³
cji³ tse³ cjoa⁴tjao²cha³ xi³ tjin¹-na³ t²a³tsaon⁴3.

Cjoa⁴ni²cha³t²a³ xi³ ma³chjen¹

⁵ Tsa² jnco³ xi³ je³qui³si³va³-na³, li²coi³ qui³si³va³-
na³ nca³ to⁴an³, to⁴nca³ sa³nta³ qui³si³c²a³cao⁴t²a³
i⁴tse¹-no³ nca³ts²io³. C²oa⁴-s²in² xian³, jme¹-ni³
nca³ tsi² tse³ en¹tsjo²a³ si³chjen¹-si¹nia³. ⁶ Je² xi³
c²oa⁴qui³s²in³, to⁴coan³-la²ni³le⁴ je² cjoa⁴ñi²ain³-vi⁴,
nca³ ncjin² coan³ xi³ je³qui³si³cja³a¹-le⁴. ⁷ To⁴sa³
jon² ti⁴cha³t²a³-lao⁴3, c²oa⁴ ti⁴je³ta³con²-lao⁴3, jme¹-
ni³ nca³ je² xi³ c²oa⁴qui³s²in³ li²coi³ ya⁴ cjoe⁴jin³
cjoa⁴va³ xi³ n²ion¹ tse³. ⁸ To⁴coi³ cjoa⁴ v²e³ts²oa²³-
ni³no³ nca³ si⁴qui²xi⁴ya³tsaon³ je² cjoa⁴tjao²cha³-no³
xi³ t²a³ts²e⁴ nca³ je². ⁹ C²oa⁴-ti⁴ to⁴coi³ cjoa⁴-vi⁴
nca³ qui³squi³-no³ nca³ qui³sco²t²a³-no³ nca³ jon²
tsa² qui³ni²tjо³son²³ nca³yi³je³. ¹⁰ C²oa⁴ je² xi³ jon²
ni²cha³t²a³-lao⁴3, c²oa⁴-ti⁴ an³ si³cha³t²a³-le⁴. Je² xi³
an³ qui³si³cha³t²a³, tsa² tjin¹ xi³ qui³si³cha³t²a³,
c²oa⁴-s²in² qui³s²ian³ xi³ t²a³tsaon⁴3 nqui³xcon⁴
Cristo, ¹¹ jme¹-ni³ nca³ tsi² si⁴qui³njen³-si¹ni³na¹
Satanás, nca³ ²ya³-nia¹ cjoa⁴fa³a¹tsjen³ma²ñia⁴-le⁴.
¹² C²ia⁴ nca³ je²e⁴ ya⁴ Troas nca³ qui³nchja²ya³ je²
en¹nta³ xi³ t²a³ts²e⁴ Cristo, qui³s²e³ti⁴x²a⁴nte³-na³
t²a³ts²e⁴ Nai³-na¹, ¹³ to⁴nca³ li²coi³ qui³si³cja¹ya³
ni⁴ma⁴-na⁴, nca³ tsi² tsa² coan³sjai³-na³ nts²e³2 Tito.
C²oa⁴-s²in² qui³si³xa³t²a³ cho⁴ta⁴ ya⁴-ve⁴, c²oa⁴ quia³
ya⁴ Macedonia.

Ni²qui³njen³² nca³ ti³yo³coa⁴2 Cristo

¹⁴ To⁴nca³ Ni³na¹ ca²ta³v²ai²-le⁴ cjoa⁴nta³, nca³
je² xi³ tsjoa¹-na¹ nca³ntsjai² nca³ ni²qui³njen³²

nca³ ma³nquin¹coa⁴² Cristo Jesús. Xi³ to⁴t⁷a³tsan⁴²
 Ni³na¹ si¹c²a³vi¹son² nca³qui³jnta² je² cjoa⁴qui²xi⁴
 xi³ t⁷a³ts⁷e⁴ Cristo, xi³ jo³-ni³ xo³nco¹sja³ nca³
 ma³nca³va³son². ¹⁵ Xi³ t⁷a³ts⁷e⁴ Ni³na¹ jta⁴nta³njen⁴-
 le⁴ Cristo nia¹, ya⁴jin³-le⁴ je² xi³ vi³tjo³ntjai²,
 c⁷oa⁴ ya⁴jin³-le⁴ xi³ cha³. ¹⁶ Xi³ t⁷a³ts⁷e⁴ xi³
 cha³ xi³ cjoa⁴qui²xi⁴ jta⁴-le⁴ cjoa⁴vi³ya³ nia¹ xi³
 tsjoa¹ cjoa⁴vi³ya³, c⁷oa⁴ t⁷a³ts⁷e⁴ xi³c²a³ jta⁴-le⁴
 cjoa⁴vi³jna³chon³ nia¹ xi³ tsjoa¹ cjoa⁴vi³jna³chon³.
 C⁷oa⁴ xi³ t⁷a³ts⁷e⁴ je² cjoa⁴-vi⁴, ⁷ya¹-ni³ xi³ coan⁴-
 le⁴ cjoa⁴ je²-vi⁴. ¹⁷ Nca⁴ jin⁴-jin⁴ li²coi³ c⁷oa⁴-s⁷in²
 cjoain³-jin⁴ jo³-ni³ tsa² je² xi³ ncjin² ma³-ni³, xi³
 v⁷a³na⁴cha⁴ xi³ si¹qui³njen³ t⁷a³-ts⁷e⁴ en¹-le⁴ Ni³na¹,
 to⁴nca³ jin⁴-jin⁴ tjin¹qui²xi⁴ t⁷a³tsain⁴-jin⁴, nca³ ts⁷e⁴
 Ni³na¹ ni¹⁴-jin⁴. Nqui³xcon⁴ Ni³na¹ no²cjoai⁴-jin⁴
 nca³ ti³yo³coai⁴-jin⁴ Cristo.

3

*Si⁴xa¹-le⁴² Ni³na¹ t⁷a³ts⁷e⁴ cjoa⁴cho⁴tse⁴ xi³
 tjin¹n⁷ion¹*

¹ A³ c⁷oe¹ts⁷ia⁴cao⁴ nqui²jnco³c²ai²-jin⁴ nca³
 ch⁷a⁴sje³ntai³-jin⁴ yao³-na⁴jin⁴, a³xo⁴ jo³-ni³ c²a³
 a³ ma³chjen¹-na³jin⁴ xon⁴carta xi³ c⁷oa⁴sje³nta³-
 na³jin⁴ xi³ t⁷a³tsaon⁴³, a³xo⁴ xi³ tsaon⁴³. ² Jon²
 nio¹³ xi³ coio³ xon⁴-na⁴jin⁴, xi³ tjio¹t⁷a³ ya⁴jin³
 ni⁴ma⁴-na⁴jin⁴, xi³ nca³ts⁷i³ cho⁴ta⁴ ve³, c⁷oa⁴
 v⁷e¹xquia⁴. ³ ⁷ya³son²tsen³-le⁴ nca³ jon² xon⁴-le⁴
 Cristo, xi³ jin⁴chji³-jin⁴, xi³ li²coi³ nta¹jin¹ qui³chji³-
 ni³, to⁴nca³cao⁴je² Espíritu Santo xi³ts⁷e⁴ Ni³na¹ xi³
 ti¹jna³con³. Li²coi³ ya⁴ tjio¹t⁷a³jon³ la⁴jao⁴, to⁴nca³
 ya⁴ tjio¹t⁷a³jon³ xi³ yao³ xi³ ni⁴ma⁴-le⁴ cho⁴ta⁴.

4 C'oa⁴-s²in² nta³ tjio¹jnco³con³ ni⁴ma⁴-na⁴jin⁴
 xi³ to⁴t'a³ts²e⁴ Cristo nqui³xcon⁴ Ni³na¹. 5 Li²coi³
 nca³ ti⁴jin⁴-ni³ ma³-na³jin⁴ nca³ si⁴cja³?ai³tsjain³-
 jin⁴ nca³ tjin¹ to⁴jme³-ni³ve⁴ xi³ to⁴t'a³tsain⁴-jin⁴,
 to⁴nca³ je² xi³ to⁴t'a³ts²e⁴ ma³-na³jin⁴, je² Ni³na¹,
 6 xi³ c²oa⁴-ti⁴ qui³tsjoa³-na³jin⁴ nca³n²ion¹ nca³ ma³-
 na³jin⁴ ni²xa¹-lai⁴jin⁴ t'a³ts²e⁴ jnco³ cjoa⁴cho⁴tse⁴ xi³
 tjin¹n²ion¹, li²coi³ xi³ ts²e⁴ xi³ je³tji¹t'a³, to⁴nca³ je²
 xi³ ts²e⁴ Espíritu Santo, nca³ je² xi³ tji¹t'a³ si¹c²en³,
 to⁴nca³ je² Espíritu Santo tsjoa¹ cjoa⁴vi³jna³chon³.
 7 C'oa⁴ je² cjoa⁴ xi³ qui³sco³?ai²?nte²-le⁴ cjoa⁴vi³ya³,
 xi³ ya⁴ qui³s²e³t'a³jon³ la⁴jao⁴, c²oa⁴coan³ cao⁴
 cjoa⁴je³ya³, sa³?nta³ je² xti³-le⁴ Israel li²coi³
 coan³ n²ion¹ qui³sco²tsen³-le⁴ je² ncjain¹ Moisés,
 to⁴t'a³ts²e⁴ je² cjoa⁴je³ya³-le⁴ ncjain¹. Je² cjoa⁴je³ya³
 tjin¹-ni³ nca³ qui³ qui³cha³. 8 Jo¹-s²in² nca³
 tsi² nqui²sa⁴ nta³ coi⁴tjo³je³ya³ je² cjoa⁴ xi³ je²
 Espíritu Santo cjo³?ai²?nte²-le⁴. 9 Tsa² je² cjoa⁴
 xi³ qui³sco³?ai²?nte²-le⁴ cjoa⁴n²ain³ coan³ cao⁴
 cjoa⁴je³ya³, nqui²sa⁴ to⁴coan⁴je³ya³ je² cjoa⁴je³ya³-
 le⁴ je² cjoa⁴ xi³ cjo³?ai²?nte²-le⁴ cjoa⁴qui²xi⁴. 10 Je²
 xi³ qui³s²e³-le⁴ cjoa⁴je³ya³, li²coi³ ti⁴c²oa⁴-s²in²
 tjin¹-ni³le⁴ cjoa⁴je³ya³ nt²ai⁴, nca³ tjin¹ nqui²jnco³
 cjoa⁴je³ya³ xi³ to⁴nqui²sa⁴ nc²a³ tjin¹. 11 Tsa² je²
 xi³ cha³, qui³s²e³-le⁴ cjoa⁴je³ya³, nqui²sa⁴ to⁴s²e⁴-
 le⁴ cjoa⁴je³ya³ je² xi³ v²e²jna³ntsjai². 12 C'oa⁴-s²in²
 nca³ ti³cho³ya²-le⁴ coi³ cjoa⁴-vi⁴, n²ion¹con³ ni⁴ma⁴-
 na¹ nca³ no²cjoa⁴-nia¹. 13 Li²coi³ jo³-ni³ Moisés xi³
 tsa³c²e¹jtsa³ ncjain¹ jnco³ na³jñ³, jme¹-ni³ nca³ je²
 xti³-le⁴ Israel li²coi³ n²ion¹ qui³sco²tsen³-le⁴ jo³-s²in²
 cjo⁴t'a³ je² xi³ tjin¹-ni³ nca³ cha⁴. 14 To⁴nca³ je²

cjoa⁴fa^{3?}ai³tsjen³-le⁴ cho⁴ta⁴ Israel xi¹jin³ coan³. Sa^{3?}nta³ nt²ai⁴-vi⁴ c²ia⁴ nca³ v²e¹xquia⁴ je² cjoa⁴ xi³ jchi¹nca³ xi³ tjin¹n²ion¹, to⁴jo³ cje³ tjo³sje³jtsa³-jin²le⁴ na³jñō³ xi³ ti⁴coi³-ni³, xi³ to⁴Cristo fa^{3?}a¹xin². **15** Sa^{3?}nta³ nt²ai⁴-vi⁴, je² na³jñō³ to⁴jo³ cji³jtsa³ ni⁴ma⁴-le⁴, to⁴c²ia⁴-ni³ve⁴ nca³ s²e³xquia⁴jin³-ni³ xi³ ts²e⁴ Moisés. **16** To⁴nca³ c²ia⁴ nca³ si¹c²o¹fa³ya³t²a³-le⁴ je² Nai³-na¹, je² na³jñō³ xi³ cji³jtsa³ tjo¹xin². **17** Je² Nai³-na¹ tso²-ni³ Espíritu Santo. C²oa⁴ jñā³ nca³ tjin¹ je² Espíritu Santo xi³ ts²e⁴ Nai³-na¹, ya⁴ tjin¹ cjoa⁴ntai¹. **18** To⁴coi³ ña¹ nca³ts²ia³ nca³ tsi² tgio¹ma³ ncjan³, nca³ cho¹tsen³ya³ jo³-ni³ tsa² jnco³ cho⁴tsin¹ je² cjoa⁴je³ya³-le⁴ Nai³-na¹, c²oa⁴-s²in² cji³v²a³ntjai²ya³ nca³ c²oa⁴coan⁴ cjoan³ jo³ cjoan³ Nai³-na¹, nca³ tjin¹-na¹ cjoa⁴je³ya³, c²oa⁴ nqui²sa⁴ tse³ cjoa⁴je³ya³ nca³ nčhoa¹-ni³ je² Nai³-na¹ xi³ je² Espíritu.

4

Je² en¹nta³ xi³ t²a³ts²e⁴ Cristo xi³ si¹i³sen³

1 To⁴coi³ nca³ tjin¹-na³jin⁴ jin⁴-jin⁴ je² xa¹-vi⁴, jo³-s²in² Ni³na¹ coan³ma⁴que³-na³jin⁴, li²coi³ ma^{3?}i³ntai³-jin⁴. **2** To⁴nca³ qui³chja^{3?}a²xin²-jin⁴ je² cjoa⁴ xi³ to⁴ma³-s²in² s²in¹ xi³ ts²e⁴ cjoa⁴soa³, nca³ tsi² cjoa⁴ma²ñna⁴ coi⁴to¹mjen³coai⁴-jin⁴, nca³ tsi² si⁴c²a³ntjai²yai³-jin⁴ je² en¹-le⁴ Ni³na¹, to⁴nca³ ch²a⁴sje³son²tsain³-jin⁴ je² xi³ cjoa⁴qui²xi⁴, nca³ ti⁴jin⁴-ni³jin⁴ nta³ ch²a²sjai³-jin⁴ yao³-na⁴jin⁴ t²a³ts²e⁴ cjoa⁴fa^{3?}ai³tsjen³-le⁴ nca³ts²i³ cho⁴ta⁴ nqui³xcon⁴ Ni³na¹. **3** Tsa² je² en¹nta³ xi³ t²a³ts²e⁴ Cristo xi³ no²cjoa⁴yai³-jin⁴ to⁴jo³ tji¹jtsa³ma³,

tji¹jtsa³?ma³jin³-le⁴ to⁴je² xi³ cha³. **4** T⁷a³ts⁷e⁴ xi³ cha³, je² ni³na¹ xi³ ts⁷e⁴ son³?nte³-vi⁴ nt⁷ai⁴-vi⁴ tsa³c⁷e¹chjoa²nqui³ cjoa⁴fa³?ai³tsjen³-le⁴ je² xi³ tsi² ma³cjain¹-le⁴, jme¹-ni³ nca³ tsi² s⁷e⁴-si¹ni³le⁴ sen¹ cao⁴ cjoa⁴i³sen³-le⁴ je² en¹nta³ xi³ t⁷a³ts⁷e⁴ cjoa⁴je³ya³-le⁴ Cristo xi³ Ni³na¹ ji³tjo³jin³. **5** Nca⁴ tsi²coi³ no²cjoa⁴yai³jin⁴ xi³ ti⁴t⁷a³tsain⁴-ni³jin⁴, to⁴t⁷a³ts⁷e⁴ Jesucristo nca³ Nai³-na¹ ma³, c⁷oa⁴ jin⁴-jin⁴ cho⁴nta³-no³ mai³jin⁴ xi³ t⁷a³ts⁷e⁴ Jesús. **6** Nca⁴ Ni³na¹ xi³ c⁷oa⁴qui³tso², je² l⁷i¹ ca²ta³ma³i³sen³-ni³ jñia³ njion²chon³, c⁷oa⁴ je² ni¹ xi³ qui³si³i³sen³jin³ ni⁴ma⁴-na⁴jin⁴. C⁷oa⁴-s⁷in² t⁷a³tsain⁴-jin⁴ qui³si³i³sen³, jme¹-ni³ nca³ jcha⁴-si¹ni³jin⁴ je² cjoa⁴je³ya³-le⁴ Ni³na¹ xi³ ncjain¹ Jesucristo ma³tsen³-ni³.

Pablo ti¹jna³con³-ni¹ xi³ to⁴t⁷a³ts⁷e⁴xi³ ma³cjain¹-le⁴

7 To⁴nca³ tjin¹-na³jin⁴ je² cjoa⁴-vi⁴ xi³ n⁷ion¹ nta³ jo³-ni³ tsa² ja⁴ya³-le⁴ jnco³ ti⁴ xi³ ni³?nte³, jme¹-ni³ nca³ jcha⁴-si¹ni³le⁴ nca³ je² nca³n⁷ion¹ xi³ n⁷ion¹ tse³ ts⁷e⁴ Ni³na¹ ni¹, a³li² tsain⁴-jin²jin⁴. **8** To⁴jo³ cji³ nca³yi³je³ tjin¹-na³jin⁴ cjoa⁴ñ⁷ain³, to⁴nca³ li²jo³ ma³-na³jin⁴. Li²coi³ ?yai³jin⁴ jme³ xi³ s⁷iain⁴-jin⁴, to⁴nca³ li²coi³ ni²cjao¹jin³-jin⁴. **9** Tjin¹ xi³ tjen⁴nqui³co²ntran⁴-na³jin⁴, to⁴nca³ li²coi³ qui³njion²-ta³con²na³jin⁴, ni²c⁷a³tsao³-na³jin⁴, to⁴nca³ li²coi³ chai³jin⁴. **10** Nca³ntsjai² to⁴jñia³-ni³ main¹cao⁴jin³-jin⁴ yao³-na⁴jin⁴ je² cjoa⁴vi³ya³ xi³ ts⁷e⁴ Jesús, jme¹-ni³ nca³ c⁷oa⁴-ti⁴ je² cjoa⁴vi³jna³chon³-le⁴ Jesús c⁷oa⁴-ti⁴s⁷in²

coan⁴tsen³jin³-si¹ni³ yao³-na⁴jin⁴. 11 Nca⁴ jin⁴-jin⁴ xi³ ti³yo³choin³-jin⁴, v⁷ai²t⁷ain³ntsjai²-na³jin⁴ cjoa⁴vi³ya³ xi³ t⁷a³ts⁷e⁴ Jesús, jme¹-ni³ nca³ je² cjoa⁴vi³jna³chon³-le⁴ Jesús coan⁴tsen³jin³-si¹ni³ yao³-na⁴jin⁴ xi³ m⁷en³. 12 C⁷oa⁴-s⁷in² cjoa⁴vi³ya³ si¹xa¹jin³-na³jin⁴ nca³ jin⁴, to⁴nca³ cjoa⁴vi³jna³chon³ si¹xa¹jin³-no³ nca³ jon². 13 To⁴nca³ to⁴nco¹son²-s⁷in² ma³cjain¹-na³jin⁴ jo³-s⁷in² coan³cjain¹-le⁴ je² xi³ c⁷oa⁴-s⁷in² qui³squi³: Coan³cjain¹-na³, to⁴coi³ c⁷oa⁴-s⁷in² qui³nchja²³-nia³. Jin⁴-jin⁴ c⁷oa⁴-ti⁴s⁷in²ni³ ma³cjain¹-na³jin⁴, to⁴coi³ c⁷oa⁴-s⁷in² no²cjoa⁴-ni³jin⁴. 14 'ya³qui²xi⁴-ni¹⁴jin⁴ nca³ je² xi³ qui³si³cja³?a¹ya³-le⁴ Nai³-na¹ Jesús, c⁷oa⁴-ti⁴ jin⁴-jin⁴ si⁴2cja³?a¹ya³-na³jin⁴ cao⁴ Jesús, c⁷oa⁴ si⁴2ca³tio¹va³sen³-na³jin⁴ cao⁴ jon². 15 Nca³yi³je³ je² cjoa⁴-vi⁴ t⁷a³tsaon⁴ nio¹³, jme¹-ni³ nca³ coan⁴tse³ya³-si¹sa³ni³ cjoa⁴nta³ xi³ t⁷a³ts⁷e⁴ cho⁴ta⁴ncjin²-sa³, c⁷oa⁴ jme¹-ni³ nca³ c⁷oai⁴-si¹sa³ni³le⁴ cjoa⁴nta³ Ni³na¹, c⁷oa⁴-s⁷in² coan⁴tse³ya³-sa³ je² cjoa⁴je³ya³-le⁴ Ni³na¹. 16 To⁴coi³ li²coi³ ma³i³nta³-ni³jin⁴. To⁴nca³ nta³ tsa² je² yao³cho⁴ta⁴-na⁴jin⁴ c⁷oa⁴-s⁷in² ti¹fe³nqui³, je² jo³ cjoan³ya³-na³jin⁴ cji³ma³cho⁴tse⁴ya³ ni⁴čhjin³ nca³ nchaon³. 17 C⁷oa⁴ je² cjoa⁴ñ?ain³-na⁴jin⁴ xi³ to⁴jnco³ tjo² nt⁷ai⁴-vi⁴, xi³ xan⁴ tjin¹, ti¹v²e¹nta³-na³jin⁴ xi³ nqui²sa⁴ tse³ cjoa⁴je³ya³ xi³ nca³ntsjai² xi³ li²coi³ ma³ ma³ni²nco¹son². 18 Nca⁴tsi² ni²sin³-lai⁴jin⁴ cjoa⁴ xi³ ma³tsen³, to⁴nca³ je² xi³ tsi² ma³tsen³, nca³ je² cjoa⁴ xi³ ma³tsen³ to⁴fa³?a³to³-ni¹, to⁴nca³ je² xi³ tsi² ma³tsen³ tjo¹ nca³ntsjai².

5

¹ Nca⁴ ²ya³qui²xi⁴-ni¹⁴jin⁴ tsa² je² nt⁷ia³son³?nte³
 xi³ jo³-ni³ to⁴čhjoa⁴carpa jñña³ vi³yo³?ya²-ni¹⁴jin⁴
 c⁷oa⁴-s⁷in² cjoitson¹, tjin¹-na³jin⁴ jnco³ ni³?ya³
 xi³ Ni³na¹ tsa³c⁷e¹nta³-na³jin⁴, xi³ tsi² tsa² ntsja³
 cho⁴ta⁴ coan³nta³-ni³, xi³ ti¹jna³ntsja² nc⁷a³jmi³.
² Tse³nai²⁴-jin⁴ i⁴ nt⁷ia³son³?nte³-na⁴jin⁴, nca³
 cjai¹ me³-na³jin⁴ ch⁷a²cja¹son²nc⁷ai³⁴-jin⁴ je²
 nt⁷ia³-na⁴jin⁴ xi³ cjoic⁴nčhoa³-ni³ nc⁷a³jmi³. ³ Ts²
 je³qui³ch⁷a²cjai¹⁴-jin⁴, c⁷ia⁴ li²coi³ coan⁴sjai³-jin⁴
 nca³ ti³yo³ti²-jin⁴. ⁴ Nca⁴ c⁷oa⁴-ti⁴s⁷in²ni³ jin⁴-
 jin⁴ xi³ ti³yo³jin⁴ je² nt⁷ia³na³jñño³-vi⁴, tse³nai²⁴-
 jin⁴ nca³ ñ⁷ain³ cji³ne²-na³jin⁴ cjoa⁴, li²coi³ nca³
 me³-na³jin⁴ nca³ chja⁴a²xin²-na³jin⁴ nt⁷ia³na³jñño³-
 vi⁴, to⁴nca³ coi³ nca³ me³-na³jin⁴ ch⁷a⁴cja¹soin²⁴-
 jin⁴, jme¹-ni³ nca³ je² xi³ m⁷en³ c⁷oa⁴-s⁷in²
 c⁷oa⁴ntjai²ya³jin³-ni³ cao⁴ cjoa⁴vi³jna³chon³. ⁵ C⁷oa⁴
 je² xi³ tsa³c⁷e¹nta³-na³jin⁴ t⁷a³ts⁷e⁴ xi³ ti⁴coi³-ni³
 je²-vi⁴, je² Ni³na¹, xi³ qui³tsjoa³-na³jin⁴ je² Espíritu
 Santo xi³ qui³s⁷e³jna³nqui³-na³jin⁴. ⁶ C⁷oa⁴-s⁷in²
 tjio¹jnco³ta³coin²⁴-jin⁴ nca³ntsja², nca³ ²ya³qui²xi⁴-
 ni¹⁴jin⁴ nca³ ti³yo³t⁷a³xin²-lai⁴jin⁴ Nai³-na¹tjen⁴ nca³
 ti³yo³jin³-jin⁴ yao³-na⁴jin⁴. ⁷ Nca⁴ ti³ma²-ni¹⁴jin⁴ xi³
 t⁷a³ts⁷e⁴ xi³ ma³cjain¹-na³jin⁴, li²coi³ xi³ t⁷a³ts⁷e⁴ xi³
 to⁴cho²tsain³-jin⁴. ⁸ To⁴nca³ tjio¹jnco³ta³coin²⁴-jin⁴,
 c⁷oa⁴ nqui²sa⁴ coan⁴tsjoa³-na³jin⁴ tsa² ti³yo³t⁷a³xin²-
 lai⁴jin⁴ yao³-na⁴jin⁴, nca³ ti³yo³coai⁴-jin⁴ Nai³-na¹.
⁹ To⁴coi³ c⁷oa⁴-ti⁴ nqui²sa⁴ n⁷ion¹ v⁷e²ta³con²-lai⁴jin⁴
 nca³ nta³ sa³sen¹ta³con²-lai⁴jin⁴ nca³ je², a³xo⁴ nca³ ya⁴ ti³yo³coai⁴-jin⁴.
¹⁰ Cjoa⁴n⁷ion¹ coi⁴yoa³² nca³ts⁷ia³² nqui³xcon⁴

cjoa⁴te¹xo³ma³-le⁴ Cristo, jme¹-ni³ nca³ jnco¹jnco¹
c²oai⁴-si¹ni³na¹ jo³-s²in² qui³n⁷ian³² cao⁴ yao³-na¹,
tsa² nta³ tjin¹ a³xo⁴ tsa² ch⁷ao³ tjin¹.

*Ni³na¹ tsa³c²e¹jna³t²ain³ Pablo je² en¹ xi³
ni²cjao¹nta³-ni³*

¹¹ To⁴coi³ cjoa⁴ nca³ c²oa⁴-s²in² xcon¹ ?yai³⁴-
jin⁴ Nai³-na¹, c²oa⁴-s²in² ni²nt²e¹t²ai³⁴-jin⁴ cho⁴ta⁴,
to⁴nca³ Ni³na¹ nta³ ve³son²tsen³-na³jin⁴. C²oa⁴
co³ya²-le⁴ nca³ c²oa⁴-ti⁴ ?ya³son²tsen³-na³jin⁴
ya⁴jin³-le⁴ cjoa⁴fa³⁷ai³tsjen³-no³. ¹² Li²coi³
n⁷o²sje³nta³ nqui²jnco³c²a²-ni³⁴jin⁴ yao³-na⁴jin⁴
nqui³xcon³, to⁴nca³ v⁷ai²²nte²-lai²⁴jin⁴ nca³ jon²
nca³ n⁷o²sje³je³ya³-na³jin⁴ nca³ jin⁴-jin⁴, jme¹-
ni³ nca³ s²e⁴-si¹ni³no³ en¹ xi³ coi⁴xon¹-lao⁴³ je²
xi³ v⁷a³sje³je³ya³ jo³ cjoan³ yao³-le⁴, c²oa⁴ li²coi³
v⁷a³sje³je³ya³ xi³ ts²e⁴ ni⁴ma⁴-le⁴. ¹³ Tsa² sca¹-
na³jin⁴, coi³ xi³ t²a³ts²e⁴ Ni³na¹, c²oa⁴ tsa² nta³ tgio¹-
ta³coin²⁴jin⁴, coi³ xi³ t²a³tsaon⁴³ nca³ jon². ¹⁴ Je²
cjoa⁴tjao²cha³-le⁴ Cristo cjoa⁴n⁷ion¹ s²in¹-na³jin⁴,
nca³ je³qui³ni²cja³⁷ai³tsjain³-jin⁴ je²-vi⁴, nca³ jnco³
xi³ c²en³ xi³ t²a³ts²e⁴ nca³ts²i³, coi³ tgio¹c²en³-ni³
nca³ts²i³. ¹⁵ C²oa⁴ c²en³ xi³ t²a³ts²e⁴ nca³ts²i³, jme¹-
ni³ nca³ je² xi³ tgio¹con³, li²coi³ ti⁴coa⁴tio⁴con³-
ni³ xi³ ti⁴t²a³ts²e⁴-ni³, to⁴nca³ xi³ t²a³ts²e⁴ je²
xi³ c²oa⁴-s²in² c²en³, c²oa⁴ xi³ qui³ni²cja³⁷a¹ya²-
ni³le⁴ xi³ t²a³ts²e⁴. ¹⁶ To⁴coi³ nca³ nt²ai⁴-vi⁴ xi³
fi²-sa³ni³ jin⁴-jin⁴ ni⁴ya³-jin² xi³ ?yai³⁴-jin⁴ jo³-
s²in² tgio¹ cjoa⁴fa³⁷ai³tsjen³-le⁴ cho⁴ta⁴, nta³ tsa²
c²oa⁴-s²in² tsa³⁷yai³⁴-jin⁴ Cristo jo³-s²in² tgio¹
cjoa⁴fa³⁷ai³tsjen³-le⁴ cho⁴ta⁴, to⁴nca³ nt²ai⁴-vi⁴
li²coi³ ti⁴c²oa⁴-s²in²ni³ ?ya³-ni³jin⁴ nca³ je². ¹⁷ C²ia⁴

tsa² jnco³ xi³ ti¹jna³cao⁴ Cristo, coan³cho⁴tse⁴ya³ nqui²ntia³-ni³. Je² cjoa⁴ nca³s²a⁴ je³ja³a³to³. Coe⁴-ni³ coan³cho⁴tse⁴ nca³y³je³ cjoa⁴. ¹⁸ C⁷oa⁴ nca³y³je³ je²-vi⁴ Ni³na¹ nčhoa¹-ni³. Xi³ to⁴t²a³ts²e⁴ Cristo qui³si³cjao²nta³-na¹ Ni³na¹ xi³ ti⁴t²a³ts²e⁴-ni³, c⁷oa⁴ qui³tsjao³-na³jin⁴ je² xa¹ nca³ si⁴cjao²nta³-ni³jin⁴. ¹⁹ Coi³ je²-vi⁴ nca³ Ni³na¹ tsa³c²e²jna³cao⁴ Cristo, nca³ qui³si³cjao²nta³-ni³ son³nte³ xi³ ti⁴t²a³ts²e⁴-ni³. Li²coi³ ya⁴ qui³si³c²a³je¹-le⁴, c⁷oa⁴ tsa³c²e¹jna³t²ain³-na³jin⁴ je² en¹ xi³ ni²cjao²nta³-ni³jin⁴. ²⁰ C⁷oa⁴-s²in² nca³ jin⁴-jin⁴ ti³yo³nca³jao³-lai⁴jin⁴ Cristo, jo³-ni³ tsa² Ni²na¹ xi³ v⁷e¹ts²oa³-no³ xi³ to⁴t²a³tsain⁴-jin⁴. V⁷e²ts²oa³-lai²jin⁴ xi³ to⁴t²a³ts²e⁴ Cristo, cho⁴va²nta³-nio³ cao⁴ Ni³na¹. ²¹ Je² xi³ tsi² tsa³jnqui³ je¹, Ni³na¹ qui³si³nta³-ni³ je¹ xi³ t²a³tsan⁴, jme¹-ni³ nca³ ña¹ c⁷oa⁴coan³ cjoan³-nia³² je² cjoa⁴qui²xi⁴-le⁴ Ni³na¹, nca³ ti³yo³coa⁴ Cristo.

6

¹ C⁷oa⁴-s²in² nca³ jin⁴-jin⁴, xi³ to⁴jnco³ ni²xai¹⁴-jin⁴ cao⁴ Cristo, v⁷e²ne²-lai²jin⁴ nca³ tsi² to⁴ya⁴-ni³ chjoao¹³ je² cjoa⁴nta³-le⁴ Ni³na¹. ² Nca⁴ c⁷oa⁴ts²: C⁷ia⁴ ni⁴čhjin³ xi³ nta³ qui³nčh⁷oe³-le²³, c⁷oa⁴ je² ni⁴čhjin³ xi³ ts²e⁴ cjoa⁴vi³tjo³ntjai², tsa³ca²sen⁴cao⁴-le²³. Coe⁴-ni³ je² ni⁴čhjin³-vi⁴ nt²ai⁴-vi⁴ xi³ nta³. Coe⁴-ni³ je² ni⁴čhjin³-vi⁴ nt²ai⁴-vi⁴ xi³ ts²e⁴ cjoa⁴vi³tjo³ntjai². ³ Ni⁴ya³-jin² xi³ ch⁷ao³-s²in² main¹coai⁴-jin⁴, jme¹-ni³ nca³ je² xa¹-na⁴jin⁴ li²jme³ je¹ s²e⁴ne²-si¹ni³le⁴. ⁴ To⁴nca³ to⁴jme³ cjoa⁴-ni³ nta³ ma³nquin¹coai⁴-jin⁴ yao³-na⁴jin⁴, jo³-ni³ xi³ si¹xa¹-le⁴ Ni³na¹, nca³ tse³ jcho¹cjoa⁴-

na³jin⁴, nca³ cjoa⁴ñ?ain³ chja^{3?}ai²⁴-jin⁴, nca³
 n?ion¹ cha³-na³jin⁴, nca³ tse³ cjoa⁴ cji³ne²-na³jin⁴,
⁵ nca³ v?e¹-na³jin⁴, nca³ jin³nto⁴ya¹ vi³yo^{3?}yai²⁴-
 jin⁴, nca³ cjoa⁴si³ tsao³t?a³-na³jin⁴, nca³ xa¹ n?ion¹
 xi³ n?iain²⁴-jin⁴, nca³ vi³yo³chon^{3?}ntai³⁴-jin⁴, nca³
 vi³yo³nchjain³⁴-jin⁴, ⁶ nca³ tsje³ ti³yoi³⁴-jin⁴, nca³
 chji⁴nai⁴-jin⁴, nca³ ni²cjain¹-lai⁴jin⁴, nca³ cjoa⁴nta³
 tjin¹-na³jin⁴, cao⁴ Espíritu Santo, cao⁴ cjoa⁴tjao²cha³
 xi³ ña³qui³ cjoa⁴qui²xi⁴, ⁷ cao⁴ en¹ xi³ cjoa⁴qui²xi⁴,
 cao⁴ nca³n?ion¹-le⁴ Ni³na¹, cao⁴ qui⁴cha⁴ xi³ ts⁷e⁴
 cjoa⁴qui²xi⁴ xi³ nca³qui²xi⁴ xi³ nca³scon¹ ma³chjen¹,
⁸ nca³ v?a³sje³je³ya³-na³jin⁴, c?oa⁴ nca³ ch?ao³
 v?a³sje³-na³jin⁴, nca³ no²cjoa⁴aon³-na³jin⁴, nca³ nta³
 no²cjoa⁴-na³jin⁴, nca³ c?oa⁴tso²-na³jin⁴ jo³-ni³ tsa²
 cho⁴ta⁴ xi³ v?a³na⁴cha⁴, to⁴nca³ cho⁴ta⁴ cjoa⁴qui²xi⁴
 ni¹⁴-jin⁴, ⁹ jo³-ni³ tsa² xi³ tsi² ?ya³xcon³-le⁴, to⁴nca³
 nta³ ?ya³-na³jin⁴, jo³-ni³ xi³ ti³vi³yai³⁴-jin⁴, to⁴nca³
 coe⁴-ni³ ti³yo³choin³⁴-jin⁴, jo³-ni³ xi³ ni²cja^{3?}a¹-
 na³jin⁴ cjoa⁴ñ?ain³, to⁴nca³ tsi² qui³ni²c?en³-na³jin⁴,
¹⁰ jo³-ni³ xi³ va³-na³jin⁴, to⁴nca³ tsjoa³-na³jin⁴
 nca³ntsjai², jo³-ni³tsa² xi³ yo⁴ma⁴, to⁴nca³ ncjin²xi³
 ti³ni²nchi⁴nai¹⁴-jin⁴, jo³-ni³ xi³ tsi²tsa²jme³ xi³ tjin¹-
 na³jin⁴, to⁴nca³ xi³ nai³-le⁴ mai³⁴-jin⁴ nca³yi³je³.
¹¹ C?oa⁴-s?in² ti⁴x²a⁴-na³jin⁴ ntso⁴vai³⁴-jin⁴ cao⁴
 jon² xi³ cho⁴ta⁴ corintios ?mi²-no³. Je² ni⁴ma⁴-
 na⁴jin⁴ cji³ma³tse³ya³. ¹² Li²coi³ choa³ya³ ni⁴ma⁴-
 na⁴jin⁴ t?a³tsaon⁴³, to⁴nca³ ti⁴tsaon⁴³-nio³ ni⁴ma⁴ xi³
 choa³ya³. ¹³ To⁴nca³ c?oa⁴-ti⁴ t?ian⁴-nio³ nca³ jon²,
 ti⁴tse³ya³ ni⁴ma⁴-no³. (An³ fa²cao⁴-no³ jo³-ni³ tsa²
 xti³).

Nā¹ nia¹ nt²ia³-le⁴ Ni³na¹ xi³ ti¹jna³con³

14 A³li² to⁴jnco³-jin² vi³yo³cjao³ cao⁴ xi³ tsi² ma³cjain¹-le⁴. Jme¹ cjoa⁴mi²yo⁴ xi³ tjin¹, je² xi³ cho⁴ta⁴cjoa⁴qui²xi⁴ cao⁴ je² xi³ tsi² cho⁴ta⁴cjoa⁴qui²xi⁴. Jo¹ coan⁴-ni³ nca³ sa³tio²cjao³ l¹i¹ cao⁴ jña³ njion² chon³. 15 Jo¹-s²in² coan⁴-ni³ nca³ sa³tio²cjao³-ni³ Cristo cao⁴ Belial, a³xo⁴ jme¹ nte³ xi³ to⁴jnco³ coan⁴-ni³le⁴ je² xi³ ma³cjain¹-le⁴ cao⁴ je² xi³ tsi² ma³cjain¹-le⁴. 16 Jo¹-s²in² to⁴nco¹son² va³tio²-ni³ je² nt²ia³-le⁴ Ni³na¹ cao⁴ je² xco¹son². Nca⁴ jon² nio¹³ nt²ia³-le⁴ Ni³na¹ xi³ ti¹jna³con³, jo³ qui³tso² Ni³na¹: Coa²te⁴jna³coa⁴, c²oa⁴ c²oa³mjen³jin³-le⁴ nca³ je². C²oa⁴ an³ coan⁴ Ni³na¹-le⁴, c²oa⁴ je² coan⁴ na⁴xi⁴na³nta¹-na⁴. 17 To⁴coi³ ti²tjo⁴jin³ va³sen³-ni³lao⁴3 nca³ je², c²oa⁴ ti⁴ncha³t²a³xin²-lao⁴3, tso² je² Nai³-na¹. C²oa⁴ li² ni²cao⁴-jion²³ je² xi³ ch²ao³ cjoan³, c²oa⁴ an³ scoe³tjao²³-no³. 18 C²oa⁴ an³ coan⁴ N²ai³-no³, c²oa⁴ jon² coaon⁴3 xti³x²in⁴-na⁴ c²oa⁴ xti³ya¹nchjin¹-na⁴, tso² je² Nai³-na¹ xi³ ma³yi³je³-le⁴.

7

1 C²oa⁴-s²in² jon² xi³ tsjоa³que⁴-no³, coi³ nca³ tjin¹-na¹ coi³ cjoa⁴vi⁴ xi³ qui³ni²s²e³nqui³, si⁴tsje³ya³-le⁴2 yao³-na¹ nca³yi³je³ xi³ ch²ao³ cjoan³ xi³ ts²e⁴ yao³-na¹, c²oa⁴ xi³ ts²e⁴ espíritu-na¹, nca³ ña³qui³ si⁴jncoa³2 xi³ coan⁴tsje³-nia³2 nca³ xcon¹cha³2 Ni³na¹.

*Pablo cji³ma³tsjоa³-le⁴ xi³t²a³ts²e⁴cho⁴ta⁴-le⁴ Cristo
ya⁴ Corinto*

2 T'ai²nte³jin³-na³jin⁴ ni⁴ma⁴-no³. Ni⁴?ya³-jin²
 xi³ ch⁷ao³-s⁷in² qui³ni²coai⁴-jin⁴, c⁷oa⁴ ni⁴?ya³-
 jin² xi³ qui³ni²qui³tsoin¹⁴-jin⁴, c⁷oa⁴ ni⁴?ya³-jin² xi³
 qui³ch⁷a²na⁴cha⁴-lai⁴jin⁴. 3 Li²coi³ c⁷oa⁴ti²xian³
 nca³ coa³ne²³-no³ je¹, nca³ je³c⁷oa⁴qui³xian³
 nca³ ni⁴ma⁴-na⁴jin⁴ ti³yo³jion³, nca³ to⁴jnco³
 coi⁴yoa³² tsa² coi⁴ya¹ c⁷oa⁴ tsa² coi⁴yo³choan³².
 4 A³li² c⁷oa⁴cji³ nta³ ?ve³con³-no³ nca³ jon². Xi³
 t⁷a³tsaon⁴³ a³li² c⁷oa⁴cji³ nc⁷a³coan³. N⁷ion¹ tse³
 coan³je³coan³, sa³?nta³ ts⁷a³to³ntjai² cjoa⁴tsjоa³
 xi³ tjin¹-na³ cao⁴ nca³yi³je³ cjoa⁴ñ?ain³-na⁴jin⁴.
 5 C⁷ia⁴ nca³ ja²ai⁴-jin⁴ ya⁴ Macedonia, ni⁴jme³-
 jin² cjoa⁴ni²cja¹ya³ qui³s⁷e³-le⁴ yao³-na⁴jin⁴, to⁴sa³
 c⁷oa⁴-s⁷in² qui³s⁷e³-na³jin⁴ cjoa⁴ñ?ain³ nca³yi³je³
 cjoa⁴, nca³?i⁴ nca³jan¹ cjoa⁴si³, c⁷oa⁴ ya⁴jin³ ni⁴ma⁴-
 na⁴jin⁴ cjoa⁴jcon³. 6 To⁴nca³ Ni³na¹ xi³ si¹je³con³
 je² xi³ i³nta³ tgio¹con³, qui³si³je³con³-na³jin⁴ c⁷ia⁴
 nca³ ja³ai³ Tito. 7 A³li² to⁴coi³-cjoan² nca³ ja³ai³
 Tito, to⁴nca³ c⁷oa⁴-ti⁴s⁷in² qui³ni²je³ta³con²-na³jin⁴
 cao⁴ xi³ ti⁴coi³-ni³ cjoa⁴ni²je³ta³con², jo³-s⁷in² nca³
 jon² qui³ni²je³con²³ nca³ je². Je² qui³nchja⁴jin³-
 na³jin⁴ jo³-s⁷in² nca³ tse³ qui³ni²cjao¹jin³-nao¹³,
 jo³-s⁷in² qui³chji³ntao¹³, jo³-s⁷in² qui³ni²coi²nta⁴-
 nao¹³. Coi³ nca³ nqui²sa⁴ tse³ cjoa⁴tsjоa³ qui³s⁷e³-
 ni³na³. 8 Nta³ tsa² c⁷oa⁴-s⁷in² qui³si³va³-no³ an³
 cao⁴ xon⁴-ve⁴, li²coi³ ma³fao¹jin³-na³ (nta³ tsa²
 qui³si³cjao¹jin³-nia³), nca³ti²ve³-nia¹³ nca³je²xon⁴-
 ve⁴ qui³si³va³-no³, nta³ tsa² to⁴tji¹choa³ ni⁴čhjin³.
 9 Nt⁷ai⁴-vi⁴ cji³ma³tsjоa³-na³, li²coi³-jin² nca³ c⁷oa⁴-
 s⁷in² coan³va³-no³, to⁴nca³ coi³ nca³ coan³va³-no³
 sa³?nta³ qui³ni²c⁷a³ntjai²yao³ cjoa⁴fa³?ai³tsjen³-no³.

C^ooa⁴-s²in² coan³va³-no³ jo³-s²in² Ni³na¹ me³-le⁴, jme¹-ni³ nca³ ni⁴jme³-jin² xi³ qui³ni²cha³-si¹nio³ xi³ to⁴t²a³tsain⁴-jin⁴. **10** Je² cjoa⁴va³ xi³ jo³-s²in² me³-le⁴ Ni³na¹ si²xa¹jin³-na¹ nca³ ni²c²a³ntjai²ya³² cjoa⁴fa³ai³tsjen³-na¹. C^ooa⁴-s²in² vi²tjo⁴ntje². C^oia⁴ nca³ c²oa⁴-s²in² ni²c²a³ntjai²ya³² cjoa⁴fa³ai³tsjen³-na¹, li²coi³ ni²cjao²jian³². To⁴nca³ je² cjoa⁴va³-le⁴ son³nte³ n²ion¹ si¹xa¹jin³-na¹ cjoa⁴vi³ya³. **11** Coe⁴-ni³, xi³ ti⁴coi³-ni³ cjoa⁴va³-vi⁴ jo³-s²in² nca³ me³-le⁴ Ni³na¹, jo³ cji³ tse³ cjoa⁴xi¹ti¹ya³ qui³si³xa¹jin³-no³, jo³ nca³ qui³no²cjao⁴ntjao²³ yao³-no³, jo³ nca³ jti³ coan³-no³, jo³ nca³ tsa³qui³jcon³, c²oa⁴ jo³ tse³ qui³ni²cjao¹jion³, jo³ nca³ qui³ni²coi²ntao⁴³, jo³ nca³ qui³ni²toan¹ntjao². Nca³yi³je³ cjoa⁴ tsa³ca³co²³ yao³-no³ nca³ tsjao³. **12** C^ooa⁴-s²in², nta³ tsa² c²oa⁴-s²in² qui³squi³-no³, li²coi³ c²oa⁴qui³s²ian³ xi³ t²a³ts²e⁴ xi³ cjoa⁴ts²en⁴ qui³s²in³, ni⁴t²a³ts²e⁴-jin² je² xi³ aon³ coan³-le⁴, to⁴nca³ jme¹-ni³ nca³ c²oa⁴-s²in² coan⁴son²tsen³-si¹ni³no³ jo³-s²in² nca³ qui³ni²coi²ntai⁴-jin⁴ xi³ t²a³tsaon⁴³ nqui³xcon⁴ Ni³na¹. **13** To⁴coi³ coan³je³con³-na³jin⁴. A³li² to⁴coi³-jin² cjoa⁴ni²je³ta³con²-na⁴jin⁴, to⁴nca³ nqui²sa⁴ n²ion¹ tse³ coan³tsjao³-na³jin⁴ cao⁴ cjoa⁴tsjao³-le⁴ Tito, nca³ nca³ts²io³ nca³ jon² qui³ni²qui³njen³nch²an¹jion³ je² ni⁴ma⁴-le⁴. **14** Tsa² an³ tsa³c²a³sje³je³ya³-no³ nqui³xcon⁴ nca³ je², li²coi³ c²oa⁴-s²in² coan³soa³-na³. Jo³-s²in² nca³yi³je³ xi³ tsa³qui³xon¹-lai²jin⁴, coi³ xi³ cjoa⁴qui²xi⁴, c²oa⁴-ti⁴s²in²ni³ jo³-s²in² nca³ qui³ch²a²sje³je³ya³-lai²jin⁴ nqui³xcon⁴ Tito, c²oa⁴-ti⁴s²in² coan³ xi³ cjoa⁴qui²xi⁴. **15** Je² ni⁴ma⁴-le⁴ nqui²sa⁴ tse³ti¹jna³ cao⁴jon², c²ia⁴nca³fa³ai³tsjen³-

le⁴ jo³-s²in² qui³ni²qui³tjo³son²³ nca³ts²io³, jo³-s²in²
 nca³ qui³ts²ai²nte²-lao⁴³ cao⁴ cjoa⁴jcon³ cao⁴
 cjoa⁴fa³tse¹. ¹⁶ Ma³tsjoa³-na³ nca³ c⁷oa⁴-s²in² nta³
⁷ve³con³-no³ nca³yi³je³.

8

Xi³ t²a³ts²e⁴ taon⁴ xi³ ma³xco¹ t²a³ts²e⁴ cho⁴ta⁴-le⁴
Cristo

¹ C⁷oa⁴-ti⁴s²in²ni³, nts²e³, c⁷oa⁴mi²ya³-lai²⁴jin⁴ je²
 cjoa⁴nta³-le⁴ Ni³na¹, xi³ qui³ts²ai²-le⁴ na⁴xi⁴na³nta¹-
 le⁴ Cristo ya⁴ Macedonia. ² C⁷ia⁴ nca³ tse³
 qui³sco²t²a³ cjoa⁴ñ²ain³, cjoa⁴tsjoa³ xi³ tse³
 qui³s²e³-le⁴, c⁷oa⁴ cjoa⁴yo⁴ma⁴ qui³s²e³-le⁴ xi³
 cja¹nca³ tse³, to⁴nca³ ja³a³to³ntjai² cjoa⁴nchi⁴na¹
 xi³ ts²e⁴ cjoa⁴nta³-le⁴. ³ An³ tsjoa³ en¹-na⁴ nca³
 qui³tsjoa³ jo³ tjin¹ nca³n⁷ion¹ xi³ tjin¹-le⁴, c⁷oa⁴
 sa³nta³ nca³ qui³tsjoa³son²-sa³ nca³n⁷ion¹-le⁴
 nca³ ti⁴cjoa⁴tsjoa³-le⁴ni³. ⁴ Tse³ tsa³c⁷e¹ts²oa³-
 na³jin⁴ nca³ qui³si³je¹-na³jin⁴ nca³ s²ian⁴-lai⁴jin⁴
 cjoa⁴nta³ nca³ to⁴jnco³ ca²t²a³cao⁴t²a³-le⁴ je² xa¹
 xi³ t²a³ts²e⁴ cho⁴ta⁴-le⁴ Cristo. ⁵ C⁷oa⁴ li²coi³
 c⁷oa⁴-s²in² coan³ jo³-s²in² qui³cho³ya²-lai²jin⁴,
 to⁴nca³ ti¹tjon² ti⁴je² qui³tsjoa³t²a³-le⁴ yao³-le⁴
 Nai³-na¹ cao⁴ jin⁴-jin⁴, jo³-s²in² nca³ coan³me³-
 le⁴ Ni³na¹. ⁶ Coi³ nca³ c⁷oa⁴-s²in² tsa³c⁷e²ne²-
 lai⁴jin⁴ je² Tito, jo³-s²in² nca³ tsa³c⁷e¹ts²ia⁴cao⁴
 nca³ ti¹tjon², c⁷oa⁴-ti⁴s²in² ca²ta³si¹cje³t²a³-ni³ je²
 cjoa⁴nta³-vi⁴ ya⁴jin³-no³ nta³ tsa² jon². ⁷ To⁴coi³
 jo³-s²in² nca³ tjin¹ts²a³to³ntjai²-no³ nca³yi³je³, jo³-
 s²in² nca³ ma³cjain¹-no³, jo³-s²in² nca³ no²cjoao⁴³,
 cao⁴ cjoa⁴chji⁴ne⁴, cao⁴ nca³yi³je³ cjoa⁴ni²coi²nta⁴,
 cao⁴ cjoa⁴tjao²cha³-no³ xi³ t²a³tsain⁴-jin⁴, c⁷oa⁴-ti⁴

tse³ ca²ta³s²e³ ts²a³to³ntjai²-no³ je² cjoa⁴nta³-vi⁴.
 8 Li²coi³ nchja²³ jo³-ni³ tsa² je² xi³ va³te¹xo³ma³,
 to⁴nca³ jo³-s²in² tsjоa¹nca³n²ion¹ xi³c²a³, jme¹-ni³
 nca³ cho¹t²a³-nio³ tsa² c²oa⁴-ti⁴ ña³qui³ cjoa⁴qui²xi⁴
 je² cjoa⁴tjao²cha³-no³. 9 Je³yao³ je² cjoa⁴nta³-le⁴
 xi³ ts²e⁴ Nai³-na¹ Jesucristo, nca³ xi³ t²a³tsaon⁴³
 coan³ yo⁴ma⁴, nta³ tsa² nchi⁴na¹, jme¹-ni³ nca³
 jon² c²oa⁴-s²in² nchi⁴na¹ coan⁴-nio³ xi³ to⁴t²a³ts²e⁴
 nca³ yo⁴ma⁴ coan³ nca³ je². 10 C²oa⁴ cao⁴ je² cjoa⁴-
 vi⁴ xin³ya²³-no³, nca³ je²-vi⁴ xi³ nta³ tjin¹-ni³no³
 nca³ jon². Je² xi³ ti¹tjon² tsa³c²e²ts²ia⁴cao⁴³ nta³
 ni⁴chjin³ no¹ xi³ ja³a³to³, nca³ tsi² tsa² to⁴coi³ nca³
 c²oa⁴qui³n²ian² ti¹tjon²³, to⁴nca³ c²oa⁴-ti⁴ ti¹tjon²
 c²oa⁴-s²in² coan³me³-no³. 11 Nt²ai⁴-vi⁴, tso²c²oa⁴,
 c²oa⁴-ti⁴ ti⁴cje³t²ao³ je² xi³ n²iaon²³. Jo³-s²in²
 nca³ c²oa⁴-s²in² coan³jyo³ nti⁴ton⁴-no³, c²oa⁴ti⁴-
 s²in² ti⁴tjo³son² nti⁴ton⁴³, jo³-s²in² nca³ tjin¹-no³.
 12 Tsa² jnco³ xi³ jyo³nti⁴ton⁴-le⁴, c²oa⁴-s²in² tjoе¹
 jo³ cji³ tjin¹-le⁴, li²coi³ jo³ cji³ xi³ tsin²-le⁴. 13 Li²coi³
 c²oa⁴xian³ je²-vi⁴, jme¹-ni³ nca³ je² xi³c²a³ li²coi³
 ñ²ain³ coa⁴tio⁴-si¹ni³, c²oa⁴ nca³ jon² ñ²ain³ coi⁴yo³.
 14 To⁴nca³ c²oa⁴xian³ je²-vi⁴, jme¹-ni³ nca³ nco¹son²
 coan⁴-si¹nio³, c²oa⁴ je² xi³ tse³ tjin¹-no³ nt²ai⁴-vi⁴,
 ca²ti³ncha³cao⁴ je² xi³ cha³-le⁴, jme¹-ni³ nca³ c²oa⁴-
 ti⁴ je² xi³ tse³ s²e⁴-le⁴ coi⁴ncha³cao⁴-si¹ni³no³ xi³
 cha³-no³. C²oa⁴-s²in² to⁴nco¹son² coaon⁴³. 15 Jo³-
 s²in² nca³ tji¹t²a³: Je² xi³ tse³ tsa³c²e¹xco¹, li²jme³ xi³
 qui³njen²nqui³-le⁴, c²oa⁴ je² xi³ choa³ tsa³c²e¹xco¹,
 li²jme³ xi³ qui³cha³-le⁴. 16 To⁴nca³ ca²ta³v²ai²-le⁴
 cjoa⁴nta³ Ni³na¹ xi³ qui³tsjоa³jin³ ni⁴ma⁴-le⁴ Tito
 nca³ ti⁴c²oa⁴-s²in² qui³si³coi²nta⁴-ni³no³. 17 Ña³qui³

cjoa⁴qui²xi⁴ nca³ nta³ qui³scoe¹ xi³ qui³s⁷e³ne²-le⁴. C⁷oa⁴-ti⁴s⁷in² n⁷ion¹ nta³ qui³si³coi²nta⁴-no³ nca³ ti⁴je² xi³ coan³jyo³-le⁴ nca³ qui³con³-no³.

18 Cao⁴ Tito to⁴jnco³ qui³cha³ni²coai⁴-jin⁴ je² nts⁷e³² xi³ ti³ch²a²sje³nta³ nca³ nchja⁴ya³ je² en¹nta³ xi³ t⁷a³ts⁷e⁴ Cristo ya⁴jin³ nca³ts⁷i³ na⁴xi⁴na³nta¹-le⁴ Cristo. **19** C⁷oa⁴ a³li² to⁴coi³-jin² je²-vi⁴, to⁴nca³ c⁷oa⁴-ti⁴ je² na⁴xi⁴na³nta¹-le⁴ Cristo tsa³cja³a¹jin³ nca³ je² nca³ to⁴jnco³ c⁷oa¹mjen³cao⁴-na³jin⁴, cao⁴ cjoa⁴nta³-vi⁴, xi³ coi³ xa¹-vi⁴ tjin¹-na³jin⁴. Coi³ xi³ n⁷iain²⁴-jin⁴ t⁷a³ts⁷e⁴ cjoa⁴je³ya³-le⁴ Nai³-na¹, c⁷oa⁴ nca³ coa⁴co² jo³-s⁷in² nca³ coan³jyo³ nti⁴ton⁴-no³.

20 C⁷oa⁴-s⁷in² c⁷oe¹chjoa²-lai⁴jin⁴ nca³ tsi² ⁷ya³ xi³ jin⁴-jin⁴ coa⁴ne²-na³jin⁴ t⁷a³ts⁷e⁴ je² cjoa⁴tjao² xi³ tse³ xi³ jin⁴-jin⁴ ti³ni²xa¹coai⁴-jin⁴. **21** C⁷oe¹ta³con²-lai⁴jin⁴ cjoa⁴ xi³ nta³ tjin¹, a³li² to⁴coi³cjoan² ya⁴ nqui³xcon⁴ Nai³-na¹, to⁴nca³ c⁷oa⁴-ti⁴ ya⁴ nqui³xcon⁴ cho⁴ta⁴. **22** C⁷oa⁴-ti⁴ ni²ca³sen¹coai⁴-jin⁴ nts⁷e²³ cao⁴ je², xi³ ncjin² c⁷a³ qui³cho²t⁷ai³-jin⁴ nca³ nta³ si¹coi²nta⁴, to⁴nca³ nt⁷ai⁴-vi⁴ nqui²sa⁴-sa³ nta³ si¹coi²nta⁴ nca³ c⁷oa⁴-s⁷in² tse³nta³ ve³con³-no³ nca³ jon². **23** Nt⁷ai⁴-vi⁴ je² xi³ v⁷a³cao⁴-le⁴ Tito, mi²yo⁴-na⁴ ma³-ni³ xi³ ña³tjen⁴ si¹xa¹cao⁴-na³ t⁷a³tsaon⁴³. C⁷oa⁴-ti⁴ je² xi³ v⁷a³cao⁴-le⁴ nts⁷e³², je² ni¹ xi³ fi² tsjoa¹ en¹ xi³ t⁷a³ts⁷e⁴ je² na⁴xi⁴na³nta¹-le⁴ Cristo c⁷oa⁴ c⁷oa⁴sje³je³ya³ Cristo. **24** Ta⁴co²son²tsen³-lao⁴³ tso²c⁷oa⁴, nqui³xcon⁴ je² cho⁴ta⁴-vi⁴, c⁷oa⁴-ti⁴s⁷in² nqui³xcon⁴ nca³ts⁷i³ na⁴xi⁴na³nta¹-le⁴ Cristo, jo³-s⁷in² nca³ tsjoa³chao³, c⁷oa⁴ jo³-s⁷in² nca³ tjin¹ cjoa⁴qui²xi⁴ nca³ ch²a²sje³je³ya³-lai²⁴jin⁴.

9

1 C²oa⁴ je² taon⁴ xi³ ma³xco¹ xi³ t²a³ts²e⁴ cho⁴ta⁴-le⁴ Cristo, li²coi³ ti⁴ma³chjen¹-ni³na³ nca³ squi³-no³ t²a³ts²e⁴ je²-vi⁴. 2 Nca³ ²ve³-nia¹³ jo³-s²in² nca³ jyo³nti⁴ton⁴-no³. Coi³ xi³ v²a³sje³je³ya³-ni³no³ nqui³xcon⁴ cho⁴ta⁴ ya⁴ Macedonia, nca³ Acaya je³ti¹jna³nta³ sa³nta³ ni⁴čhjin³ no¹ xi³ ja³a³to³. C²oa⁴ jo³-s²in² nca³ qui³ni²coi²ntao⁴, ncjin² xi³ c²oa⁴-s²in² qui³ni²cja³a¹-lao⁴ nca³ cji³ma³me³con³. 3 To⁴nca³ si³ca³sen¹³ nts²e³², jme¹-ni³ nca³ je² cjoa⁴je³ya³-na⁴jin⁴ xi³ t²a³tsaon⁴ li²coi³ to⁴xo³c²oa⁴coan⁴ cjoa⁴-vi⁴, jme¹-ni³ nca³ coi⁴yo³nta³-si¹nio³ jon² jo³ qui³xian³, 4 c²oa⁴ jme¹-ni³ nca³ tsi² tsa² to⁴jin⁴ coan⁴soa³-si¹ni³na³jin⁴, c²oa⁴-ti⁴ coaon⁴ nca³ jon², nca³ c²oa⁴-s²in² n²ion¹ nta³ tsa³ya³ta³con²-lai²jin⁴. C²oa⁴ coan⁴ tsa² cjoa⁴ai¹cao⁴-na³ cho⁴ta⁴ macedonios, tsa² scoe⁴-no³ nca³ to⁴jo³ cje³ ti³yo³nta³-jin²nio³. 5 To⁴coi³ qui³si³cja³ai³tsjen³ nca³ coan³chjen¹-ni³na³ nca³ tsa³c²e³ne²³-le⁴ nts²e³² nca³ coai⁴con³ ti¹tjon²-ni³no³ nca³ jon², c²oa⁴ nca³ to⁴nqui³-ni³ c²oe¹yo³nta³ ti¹tjon²³ je² cjoa⁴tjao² xi³ coan³xco¹ xi³ qui³ni²s²e³nquio³, jme¹-ni³ nca³ to⁴tjin¹nta³-ni³ je² cjoa⁴tjao²-vi⁴ jo³-ni³ xi³ ni⁴ma⁴-no³ ji³tjo³jin³-ni³, c²oa⁴ li²coi³ to⁴cjoa⁴n²ion¹ coan⁴-no³. 6 To⁴nca³ je²-vi⁴ c²oa⁴xin³-no³: Je² xi³ choa³ v²e¹ntje², c²oa⁴-ti⁴ choa³ coan⁴jcha¹-le⁴. C²oa⁴ je² xi³ tse³ v²e¹ntje², c²oa⁴-ti⁴ tse³ coan⁴jcha¹-le⁴. 7 Nca³ jnco¹jnco¹ ca²ta³tsjoa¹ jo³-s²in² co³son²-ni³le⁴ ni⁴ma⁴-le⁴, a³li² cao⁴ cjoa⁴va³-jin², ni⁴cao⁴ cjoa⁴n²ion¹-jin², nca⁴ Ni³na¹ tsjoa³que³ je² xi³ cao⁴ cjoa⁴tsjoa³

tsjoa¹. **8** C'oa⁴ Ni³na¹ tjin^{1-le⁴} nca³n⁷ion¹ nca³ nqui²sa⁴ si⁴ts³ya^{3-no³} nca³yi³je³ cjoa⁴nta³, nca³ s⁷e⁴nts²jai^{2-no³} nca³yi³je³ xi³ ma³chjen^{1-no³}, jme^{1-ni³} nca³ tse³ coan⁴ncjin²ya^{3-si¹ni³no³} nca³yi³je³ xa¹ xi³ nta³, **9** jo^{3-s⁷in²} nca³ tji^{1-t²a³}: Qui³si³c²a³vi¹, qui³tsjoa^{3-le⁴} cho⁴ta⁴yo⁴ma⁴. Je² cjoa⁴ qui²xi^{4-le⁴} tjin¹ nca³nts²jai². **10** Je² xi³ tsjoa^{1-le⁴} na⁴xin⁴ je² xi³ v⁷e¹ntje², c⁷oa^{4-ti⁴} tsjoa^{1-le⁴} nio⁴xti²la⁴ xi³ vi³cha², c⁷oa^{4-ti⁴} si⁴ncjin²ya^{3-no³} xi³ ma³ s⁷e³ntje², c⁷oa⁴ si⁴ts³ya^{3-sa³} xi³ coan⁴jcha¹ xi³ ts⁷e⁴ cjoa⁴qui²xi^{4-no³}. **11** C'oa^{4-s⁷in²} coan⁴nchi⁴na^{1-nio³} cao⁴ nca³yi³je³, jme^{1-ni³} nca³ tse³ c⁷oai^{4-si¹ni³lao⁴3} nca³yi³je³ cjoa⁴nta³ xi³c²a³, xi³ si⁴2xa¹jin^{3-le⁴} nca³ tsjoa^{1-le⁴} cjoa⁴nta³ Ni³na¹ c⁷ia⁴ nca³ cha⁴ni^{2-lai⁴jin⁴} cjoa⁴tjao^{2-no³}. **12** C⁷ia⁴ nca³ v⁷e¹ je² taon^{4-vi⁴} xi³ c⁷oa^{4-s⁷in²} vi³ncha³cao⁴, a³li² to⁴coi^{3-cjoan²} nca³ tsjoa¹ je² xi³ cha^{3-le⁴} cho⁴ta^{4-le⁴} Cristo, to⁴nca³ c⁷oa^{4-ti⁴} ma³ts³ya³ je² cjoa⁴nta³ xi³ ncjin² ma^{3-ni³} xi³ tsjoa^{1-le⁴} Ni³na¹. **13** C'oa^{4-s⁷in²} c⁷oa⁴sje³je³ya³ Ni³na¹ nca³ c⁷oa^{4-s⁷in²} ni²qui²xi⁴yao³ jo^{3-s⁷in²} ni²tjo³son^{2-lao⁴3} je² en¹nta³ xi³ t²a³ts²e⁴ Cristo, nca³ c⁷oa^{4-s⁷in²} cho^{1-t²a^{3-no³} nca³ v⁷ao²³ taon^{4-vi⁴} c⁷oa⁴ nca³ tse³ ma³ cjoa⁴tjao^{2-no³} xi³ c⁷oai^{4-lao⁴3} nca³ je² c⁷oa⁴ nca³ts²i³. **14** C'oa^{4-ti⁴s⁷in²ni³} nca³ je² v⁷e¹ts²oa³ntjai^{2-no³}. N⁷ion¹ coan⁴me³con^{3-no³} nca³ tjin^{1-no³} je² cjoa⁴nta^{3-le⁴} Ni³na¹ xi³ n⁷ion¹ tse³. **15** Cjoa⁴nta³ ca²ta³v⁷ai^{2-le⁴} Ni³na¹ xi³ t²a³ts²e⁴ je² cjoa⁴tjao^{2-le⁴} xi³ tsi² tsa² ya³ xi³ ma³jin^{3-le⁴}.}

10

Pablo nchja⁴ntjai² je² xa¹ xi³ qui³ts²ai^{2-le⁴} jo^{3-ni³}

pa²stro⁴

¹ To⁴nca³ an³ nia¹³ xi³ Pablo v²e³ts²oa²³-no³ cao⁴ cjoa⁴nt²e¹ c²oa⁴ cao⁴ cjoa⁴i³nta³jin³ta³con² jo³-ni³ tsa² ts²e⁴ Cristo, an³ xi³ cjoa⁴qui²xi⁴ na³nqui³ cjia³ c²ia⁴ nca³ ti²jna⁴ nqui³xcon³ nca³ jon², to⁴nca³ c²ia⁴ nca³ xin² ti²jna⁴, ma³n²ion¹-coan³ cao⁴ nca³ jon². ² V²e³ts²oa²³-no³ nca³ tsi² tsa² tjin¹ne²-na³ nca³ coan⁴n²ion¹jin³coan³ c²ia⁴ nca³ ti²jna⁴jin³-no³, jo³-s²in² ma³n²ion¹ta³con²coa⁴ c²a³ xi³ c²oa⁴-s²in² si¹cja³?ai³tsjen³ xi³ t²a³tsain⁴-jin⁴ nca³ ti³mai³jin⁴ jo³-s²in² me³-le⁴ yao³-na⁴jin⁴. ³ Nta³ tsa² c²oa⁴-s²in² ti³ma³coai⁴-jin⁴ yao³-na⁴jin⁴ jo³-ni³ tsa² cho⁴ta⁴son³nte³, li²coi³ vi³xcain³jin⁴ jo³-s²in² cjan¹ cho⁴ta⁴son³nte³. ⁴ Je² qui⁴cha⁴ xi³ ts²e⁴ cjoa⁴jchan¹-na⁴jin⁴, a³li² ts²e⁴-jin² yao³-na⁴jin⁴, to⁴nca³ tjin¹-le⁴ nca³n²ion¹ xi³ to⁴t²a³ts²e⁴ Ni³na¹, nca³ si⁴qui³xo²ya³ to⁴jme³-ni³ xi³ n²ion¹ tgio¹. ⁵ Ni²qui³xo²yai³jin⁴ cjoa⁴fa³?ai³tsjen³ xi³ nc²a³ tgio¹ c²oa⁴ nca³yi³je³ cjoa⁴ xi³ nc²a³ tjin¹, xi³ vi³so¹tsjen⁴ co²ntran⁴-le⁴ cjoa⁴chji⁴ne⁴-le⁴ Ni³na¹. Ntoa³n²ioin¹jin⁴ nca³yi³je³ cjoa⁴fa³?ai³tsjen³, jme¹-ni³ nca³ si⁴2tjo³son²-si¹ni³le⁴ Cristo. ⁶ C²oa⁴ ti³yo³ntai³jin⁴ nca³ c²oai⁴lai⁴jin⁴ cjoa⁴ñ?ain³ to⁴jme³ cjoa⁴-ni³ xi³ tsi² si¹tjo³son², c²ia⁴ nca³ cjoa⁴coan⁴jnco³ jo³-s²in² ni²tjo³son² nca³ jon². ⁷ Jon² cho¹tsen³-lao⁴ cjoa⁴ jo³-s²in² nca³ ma³tsen³. Tsa² jnco³ xi³ ti⁴je² nta³ ve³con³-ni³ yao³-le⁴ nca³ ts²e⁴ Cristo, c²oa⁴-ti⁴ je²-vi⁴ ca²ta³si¹cja³?ai³tsjen³ nqui²ntia³ jo³-s²in² nca³ je² ts²e⁴ Cristo ni¹, c²oa⁴-ti⁴s²in²ni³ jin⁴-jin⁴ ts²e⁴ Cristo ni¹jin⁴. ⁸ Nta³ tsa² nqui²sa⁴ n²ion¹ tse³ v²a³sje³ya³-sa³ yao³-

na⁴ xi³ t²a³ts²e⁴ cjoa⁴te¹xo³ma³-na⁴jin⁴, li²coi³
 coan⁴soa³-na³. Je² Nai³-na¹ qui³tsjoa³-na³jin⁴
 cjoa⁴te¹xo³ma³ nca³ si⁴quin³nc²a³-lai²⁴jin⁴. li²coi³
 nca³ si⁴qui³xo²ya³-lai²⁴jin⁴. ⁹ Coi³ xi³ me³-na³
 nca³ tsi² tsa² coi³ coan⁴tsen³ jo³-ni³ tsa² an³ xi³
 me³-na³ coi³ncha³xcon¹-ni³no³ cao⁴ xon⁴carta.
¹⁰ Nca⁴ coi³ xi³ c²oa⁴tso²: Je² xon⁴-le⁴ n²ion¹
 nchja⁴t²a³, c²oa⁴ en¹-le⁴ n²ion¹jin³, to⁴nca³ c²ia⁴
 nca³ ti¹jna³soa³ je², tsin²-ni³le⁴ nca³n²ion¹-jin², c²oa⁴
 en¹-le⁴ a³li²jme³-ni³ chji¹-le⁴. ¹¹ Je² xo⁴cjoan³-ve⁴
 xi³ c²oa⁴tso² ca²ta³si¹cja³?ai³tsjen³jin³ je²-vi⁴, jo³
 cjoain³-jin⁴ cao⁴ en¹-na⁴jin⁴ xi³ chji³t²ai³-jin⁴ xon⁴,
 c²ia⁴ nca³ xin² ti³yoi³-jin⁴, c²oa⁴-ti⁴ coan⁴ cjoain³-
 jin⁴ cao⁴ xi³ n²iain²⁴-jin⁴ c²ia⁴ nca³ ti³yo³va³sain³⁴-
 jin⁴. ¹² Nca⁴ tsi² ma³n²ion¹-ta³coin²⁴jin⁴ nca³ ya⁴
 si⁴xqui⁴t²ai³-jin⁴ yao³-na⁴jin⁴ a³xo⁴ si⁴nco¹son²coai⁴-
 jin⁴ yao³-na⁴jin⁴ cao⁴ c²a³ xi³ ti⁴je² nta³ v²a³sje³-
 ni³ yao³-le⁴. Nca⁴ ti⁴je² v²e¹cho⁴ya³-ni³ yao³-le⁴
 ya⁴jin³-le⁴ xi¹ncjin¹, c²oa⁴ si¹nco¹son² yao³-le⁴ cao⁴
 xi¹ncjin¹, tsin²-le⁴ cjoa⁴fa²⁷ai³tsjen³-jin². ¹³ To⁴nca³
 jin⁴-jin⁴ li²coi³ si⁴c²a³toi²⁴-jin⁴ choa⁴-le⁴ nca³
 ch²a⁴sje³je³yai³⁴-jin⁴ yao³-na⁴jin⁴, to⁴nca³ jo³-s²in²
 tji¹choa⁴ cjoa⁴te¹xo³ma³ xi³ Ni³na¹ qui³tsjoa³choa⁴-
 na³jin⁴, sa³nta³ nca³ coi³cho³chon³-lai²⁴jin⁴ nca³
 jon². ¹⁴ Nca⁴ tsi² tsa² mai¹son² ts²a³to³-sai³⁴jin⁴
 choa⁴-na⁴jin⁴, jo³-ni³ tsa² tsi²coi³ coi³cho³chon³-
 lai²⁴jin⁴ sa³nta³ jon², nca³ jin⁴-jin⁴ xi³ ti¹tjoin²⁴-jin⁴
 je³ji³cho³chon³-lai²⁴jin⁴ sa³nta³ jon²cao⁴je² en¹nta³
 xi³ t²a³ts²e⁴ Cristo. ¹⁵ Nca⁴tsi² ni²c²a³toi²⁴-jin⁴ choa⁴-
 le⁴ nca³ ch²a²sje³je³yai³⁴-jin⁴ yao³-na⁴jin⁴ cao⁴ xa¹
 xi³ ts²e⁴ xi³ cja³?ai¹. To⁴nca³ cho³ya²-lai⁴jin⁴ nca³

nqui²sa⁴ coan⁴jcha¹jin³-sa³no³ je² xi³ ma³cjain¹-no³. C⁷oa⁴-s²in² nqui²sa⁴ coan⁴je³ya³ta³coin²-jin⁴ ya⁴jin³-le⁴ nca³ jon², jo³-s²in² choa⁴-le⁴ xa¹-na⁴jin⁴. **16** C⁷oa⁴ cho³ya²-lai⁴jin⁴ nca³ coi⁴no²cjoa⁴yai³-jin⁴ je² en¹nta³ xi³ t⁷a³ts⁷e⁴ Cristo ya⁴ nte³ xi³ nqui²sa⁴ cjin³t⁷a³-no³ nca³ jon², nca³tsi²ch⁷a⁴sje³je³yai³-jin⁴ yao³-na⁴jin⁴ cao⁴ je² xi³ je³ti¹jna³nta³ ya⁴ nte³-le⁴ xi³ cja⁴ai¹. **17** To⁴nca³ je² xi³ v⁷a³sje³je³ya³ yao³-le⁴, to⁴sa³ ca²ta³v⁷a³sje³je³ya³ yao³-le⁴ nca³ ti¹jna³cao⁴ Nai³-na¹. **18** Nca⁴tsi²tsa² je² xi³ ti⁴je² v⁷a³sje³nta³-ni³ yao³-le⁴, xi³ c⁷oa⁴-s²in²nta³cho²t⁷a³, to⁴nca³je² xi³ Ni³na¹ v⁷a³sje³nta³.

11

1 To⁴ma²-ni³ nca³ ni²cjain¹i⁴tsao¹ je² cjoa⁴sca¹-na⁴. Jaon³, ti⁴cjain¹-nao¹. **2** Nca⁴ c⁷oa⁴-s²in² ma³chi⁴ni⁴que⁴-no³ t⁷a³ts⁷e⁴ Ni³na¹. Nca⁴ an³ xi³ c⁷oa⁴-s²in² qui³s²ian³ nca³ qui³ni²s²e³nqui³-no³ jnco³ x²in⁴, nca³ coa³sen³jna² va³sen³-no³ jo³-ni³ tsa² jnco³ chjon⁴xo³nco¹ xi³ tsje³ t⁷a³ts⁷e⁴ Cristo. **3** To⁴nca³ tsa³cjon³-nia³ jo³-s²in² nca³ je² ye⁴ tsa³c⁷a³na⁴cha⁴-le⁴ Eva cao⁴ je² cjoa⁴ma²ñna⁴-le⁴, tsa² c⁷oa⁴-s²in² cjoitson¹jin³ je² cjoa⁴fa³ai³tsjen³-no³ nca³ coai⁴t⁷a³xin²-le⁴ nca³ tsi² ti⁴tjio¹jnco³-ni³ta³con² t⁷a³ts⁷e⁴ Cristo. **4** Nca⁴tsa² je² xi³ fa³ai³, nchja⁴ya³-no³ xi³ nqui²jnco³ Jesús cao⁴-ni³ tsa² je² xi³ qui³no²cjoa⁴yai³-jin⁴, a³xo⁴ tsa² chjoao¹ nqui²jnco³ espíritu xi³ cja⁴ai¹ cao⁴-ni³ tsa² je² xi³ je³qui³chjoao¹, a³xo⁴ nqui²jnco³en¹nta³ xi³ t⁷a³ts⁷e⁴ Cristo xi³ cja⁴ai¹ cao⁴-ni³ tsa² je² xi³ je³qui³chjoao¹,

nta³ si⁴cjain¹-lao⁴³. ⁵ Cjoa⁴qui²xi⁴ si³cja^{3?}ai³tsjen³-nia¹³ nca³ ni⁴jme³-jin² xi³ na³nqui³ ti²jna⁴-le⁴ je² pa²stro⁴ xo⁴cjoan³-ve⁴ xi³ n[?]ion¹ nc²a³ v[?]a³sje³ yao³-le⁴. ⁶ Nta³ tsa² tsi² to⁴jo³ nta³ nchja²³, to⁴nca³ li²jme³ cjoa⁴chji⁴ne⁴ xi³ cha³-na³. Cao⁴ nca³yi³je³ cjoa⁴ c²oa⁴-s²in² tsa³ca³co²son²tsen³-lai²⁴jin⁴ nca³ jon² je² cjoa⁴chji⁴ne⁴. ⁷ A³ tsa³jnqui³-nia¹³ je¹ nca³ nqui²sa⁴ na³nqui³ ti⁴an³ qui³si³cja^{3?}a³jen³-nia³ yao³-na⁴, jme¹-ni³ nca³jon² nqui²sa⁴ nc²a³ coan⁴-si¹nio³, nca³ tsi²jme³ xi³ qui³s²e³nqui³-no³ nca³ qui³nchja²ya³jin³-no³ je² en¹-le⁴ Ni³na¹. ⁸ C²oa⁴-s²in² qui³si³che²³-le⁴ xi³c²a³ na⁴xi⁴na³nta¹-le⁴ Cristo, nca³ qui³s²e³chji¹-na³, jme¹-ni³ nca³ si³xa¹³-si¹ni³no³ nca³jon². ⁹ C²ia⁴ nca³ tsa³ca²te⁴jna³cao⁴-no³ nca³jon², nca³ tjin¹ xi³ coan³chjen¹-na³, ni⁴?ya³-jin² xi³ qui³si³ch²a¹ne²-le⁴. Je² xi³ c²oa⁴-s²in² qui³cha³-na³, je² nts²e³² xi³ ji³nchoa³-ni³ Macedonia qui³tsjoa³-na³. C²oa⁴ cao⁴ nca³yi³je³ qui³si³coi²nta⁴ yao³-na⁴, c²oa⁴ si³coi²nta⁴ yao³-na⁴, nca³ tsi² tsa²jon² si³ch²a¹ne²-no³. ¹⁰ Je² cjoa⁴qui²xi⁴-le⁴ Cristo ti¹jna³jin³ ni⁴ma⁴-na⁴, nca³ li²coi³ s²e⁴chjoa²-na³ ya⁴ ?nte³ Acaya nca³ c²oa⁴-s²in² v[?]a³sje³je³ya³ yao³-na⁴ t²a³ts²e⁴ cjoa⁴ je²-vi⁴. ¹¹ A¹-ni³. A³ coi³ nca³ tsi² tsjoa³que⁴-no³. Ni³na¹ ti¹ve³ nca³ tsjoa³que⁴-no³. ¹² Je² xi³ c²oa⁴s²ian³, to⁴jo³ c²oa⁴s²in³-sa³, jme¹-ni³ nca³ coa³te³chjoa²³-si¹ni³le⁴ je² cho⁴ta⁴ xi³ me³-le⁴ nca³ c²oa⁴tso² nca³ ma³nco¹son² cao⁴ jin⁴-jin⁴. T²a³ts²e⁴ je² cjoa⁴ v[?]a³sje³je³ya³-ni³ yao³-le⁴. ¹³ Nca⁴ je²-vi⁴ pa²stro⁴ nti³so³ ni¹, cho⁴ta⁴ xi³ si¹xa¹ xi³ v[?]a³na⁴cha⁴, nca³ si¹c²a³ntjai²ya³ yao³-le⁴ nca³ c²oa⁴ma³ cjoan³ jo³-ni³ pa²stro⁴ xi³ ts²e⁴ Cristo. ¹⁴ C²oa⁴ a³li² cjoa⁴xcon¹-jin²

je²-vi⁴, nca⁴ ti⁴je²-ni³ Satanás si¹c²a³ntjai²ya³ yao³-le⁴ jo³-ni³ tsa² jnco³ a²ncje⁴ xi³ si¹?i³sen³. **15** C²oa⁴-s²in² nca³ li²coi³ si¹xcon¹ tjin¹ tsa² c²oa⁴-ti⁴ je² xi³ si¹xa¹-le⁴ si¹c²a³ntjai²ya³ yao³-le⁴ jo³-ni³ tsa² xi³ si¹xa¹-le⁴ xi³ cjoa⁴qui²xi⁴. C²oa⁴ xi³ fe³t²a³-le⁴ c²oa⁴coan⁴ jo³-s²in² xa¹-le⁴.

Tse³ cjoa⁴ñ?ain³ tsa³cja³?a¹ Pablo jo³-ni³ pa²stro⁴

16 Nqui²jnco³c²a² c²oa⁴xian³: Ni⁴?ya³-jin² xi³ ca²ta³si¹cja³?ai³tsjen³ nca³ sca¹-na³, to⁴nca³ tsa² c²oa⁴-s²in² si⁴cja³?ai³tsjaon³, chjo¹ve¹-nao¹³ jo³-ni³ jnco³ xi³ sca¹-le⁴, jme¹-ni³ nca³ to⁴jo³ c²oa³sje³je³ya³ i⁴tse¹-sa³nia³ yao³-na⁴. **17** Je² xi³ nchja²³, li²coi³ c²oa⁴-s²in² nchja²³ jo³-s²in² tsa² cjoa⁴fa³?ai³tsjen³-le⁴ Nai³-na¹, to⁴nca³ jo³-ni³ tsa² cao⁴ cjoa⁴sca¹, nca³ c²oa⁴-s²in² nta³ ?ve³coan³ yao³-na⁴ xi³ v²a³sje³je³ya³. **18** Ncjn² xi³ v²a³sje³je³ya³ yao³-le⁴ xi³ to⁴t²a³ts²e⁴ jo³-s²in² ma³tsen³. Coi³ nca³ an³ c²oa⁴-ti⁴s²in² c²oa³sje³je³ya³ yao³-na⁴. **19** Cao⁴ cjoa⁴tsjoa³ nta³ ni²cjain¹-lao⁴³ je² xi³ sca¹ya³-le⁴, nca⁴ jon² xi³ chji⁴nao⁴³. **20** Nca⁴ ni²cjain¹-lao⁴³ tsa² jnco³ xi³ to⁴cho⁴nta³ cjoa⁴n²ion¹ s²in⁴²-no³, tsa² jnco³ xi³ cjoa⁴ch²a²na⁴cha⁴ tsoa⁴-ni³no³, tsa² jnco³ xi³ si¹che¹t²a³-no³, tsa² jnco³ xi³ je³ya³ v²a³sje³ yao³-le⁴, tsa² jnco³ xi³ ncjaon¹³ c²oe⁴²?a³. **21** Si³soa³-le⁴ yao³-na⁴ nca³ c²oa⁴xian³, nca³ jin⁴-jin⁴ jo³-ni³ tsa² tsi² qui³s²e³-na³jin⁴ nca³n²ion¹. To⁴jme³ cjoa⁴-ni³ tsa² tjin¹ c²a³ xi³ ma³n²ion¹con³, c²oa⁴-ti⁴ an³ ma³n²ion¹coan³ (nchja²³ an³ jo³-ni³ xi³ sca¹-le⁴). **22** A³ cho⁴ta⁴ hebreos ni¹. C²oa⁴-ti⁴ an³. A³ cho⁴ta⁴ israelitas ni¹. C²oa⁴-ti⁴ an³. A³ ntje⁴-le⁴ Abraham ni¹. C²oa⁴-ti⁴ coi³ an³. **23** A³ si¹xa¹-le⁴ Cristo. An³

nqui²sa⁴-sa³ n²ion¹ si³xa¹³-le⁴, (jo³-ni³ jnco³ xi³ tso²va³sca¹-s²in² nchja²³). Cao⁴ xa¹ xi³ nqui²sa⁴-sa³ tse³, cao⁴ xi³ tsa³ca¹-na³ sa³?nta³ nca³tsi² coan³xqui⁴ jo³ tjin¹ c²a³, cao⁴ nca³ nto⁴ya¹ nqui²sa⁴ ncjin² c²a³ tsa³ca²te⁴jna³, c²oa⁴ ncjin² c²a³ me³c²en³.
24 Je² cho⁴ta⁴ judíos aon² c²a³ tsa³ca¹-na³, can³ čhja³aon²ño³ c²a³ nca³ jnco¹jnco¹ c²a³. **25** Jan² c²a³ c²oa⁴-s²in² tsa³ca¹-na³ cao⁴ ya¹jt³. Jnco³ c²a² nca³ la⁴jao⁴ qui³sa³te³-na³. Jan² c²a³ qui³sca³nqui³nta¹ ya⁴ nta¹chi³con³, jnco³ ni⁴čhjin³ cao⁴ jnco³ ni⁴tjen⁴ tsa³ca²te⁴jna³jian³ ya⁴ nca³va³sen³-le⁴ nta¹chi³con³.
26 Ya⁴ ntia⁴ xcon¹ ncjin² c²a³, ya⁴ xo⁴nca¹ jña³ xcon¹ chon³, xcon¹-le⁴ che¹, xcon¹-le⁴ cho⁴ta⁴ na³nqui³-na⁴, xcon¹-le⁴ cho⁴ta⁴ xi³ li² judío-jin², xcon¹-le⁴ ya⁴ na⁴xi⁴na³nta¹, xcon¹-le⁴ ya⁴?nte³t²a³xin²t²a³, xcon¹-le⁴ ya⁴ nta¹chi³con³, xcon¹-le⁴ ya⁴jin³-le⁴ nts²e³² xi³ to⁴nti³so³, **27** cao⁴ xa¹n²ion¹ cao⁴ cjoa⁴vi³jta², cao⁴ xi³ ncjin² c²a³ tsa³ca²te⁴jna³con³?nta³, cao⁴ nca³ coan³vao³-na³ coan³fa³ti²-na³, cao⁴ nca³ ncjin² c²a³ tsa³ca²te⁴jna³nchjan³, cao⁴ nca³ nch²an¹ coan³-na³, cao⁴ nca³ me³ qui³s²e³jta²³. **28** C²oa⁴ tjin¹-sa³ cjoa⁴ xi³ cja⁴?ai¹, c²oa⁴ je² xi³ c²oa⁴-s²in² ma³jtin¹ne²-na³ nca³ nchaon³nchaon³, nca³ n²ion¹ fa³tse¹ya³ ni⁴ma⁴-na⁴ t²a³ts²e⁴ nca³ts²i³ na⁴xi⁴na³nta¹-le⁴ Cristo. **29** ya¹-ni³ xi³ ma³?aon³-le⁴, tsa²tsi² nca³ an³ c²oa⁴-ti⁴ ma³?aon³-na³. ya¹-ni³ xi³ ni²sa³te¹nqui³, nca³ tsi² an³ ma³jti³ntjai²-na³. **30** Tsa² ma³chjen¹ nca³ c²oa³sje³je³ya³ yao³-na⁴, an³ c²oa³sje³je³ya³-nia³ yao³-na⁴ cao⁴ cjoa⁴?i³nta³-na⁴. **31** Je² Ni³na¹ c²oa⁴ je² N²ai³-le⁴ Nai³-na¹ Jesucristo xi³ ma³chi³con³t²ain³ nca³ntsjai² ve³-ni¹ nca³ tsi² tsa² v⁷e³nti³soa³.

32 Ya⁴ Damasco, je² gobernador xi³ ts²e⁴ ?nte³-le⁴ je² cho⁴ta⁴ti¹tjon² Aretas qui³si³coi²nta⁴ je²na⁴xi⁴na³nta¹-le⁴ cho⁴ta⁴ damascenos, jme¹-ni³nca³ tsoa⁴-si¹ni³na³. **33** Tsa³c²aon³jen³ntjai²-na³ cao⁴jnco³ ni⁴sin⁴ya¹ ya⁴ ventana-le⁴ čhjao¹nčh²oa¹-ve⁴. C²oa⁴-s²in² qui³to²ca³ntsja³-na³.

12

Pablo qui³ts²ai²jin³yao³-le⁴jnco³na³?ya¹

1 Cjoa⁴qui²xi⁴ ni¹, li²coi³ nta³ tjin¹-ni³na³ nca³c²oa³sje³je³ya³-nia³ yao³-na⁴, to⁴nca³ c²oa⁴xin³-sa³t²a³ts²e⁴je² xi³fa³a³ya³xcoan³ c²oa⁴xi³ ?ve³son²tsen³xi³ Nai³-na¹ qui³tsjao³. **2** ?ve³xcon³-nia¹³ jnco³cho⁴ta⁴ xi³ fi²t²a³-le⁴ Cristo, xi³ je³coan³ te³ño³no¹ qui³ntoa³ nti⁴ton⁴-ni³, sa³?nta³ xi³ ma³jan²-ni³nc²a³jmi³ (tsa² ti¹jna³jin³ yao³-le⁴, li²coi³ ?ve³, c²oa⁴tsa² tsi² ti¹jna³jin³ yao³-le⁴, li²coi³ ?ve³. Ni³na¹xi³ ve³). **3** C²oa⁴ ?ve³xcon³-nia¹³ je² cho⁴ta⁴-ve⁴, (tsa² ti¹jna³jin³ yao³-le⁴ a³xo⁴ tsa² tsi² ti¹jna³jin³ yao³-le⁴, li²coi³ ?ve³. Ni³na¹xi³ ve³) **4** c²oa⁴-s²in² qui³ntoa³nti⁴ton⁴-ni³ sa³?nta³ nc²a² ya⁴ jñia³ paraíso?mi², jñia³ nca³ qui³nčh²oe¹-le⁴ en¹ xi³ n²ion¹xcon¹, xi³ tsi² tjo³?nte³-le⁴ nca³ nchja⁴ cho⁴ta⁴. **5** Xi³ t²a³ts²e⁴ je² cho⁴ta⁴-ve⁴, c²oa³sje³je³ya³ yao³-na⁴, to⁴nca³ xi³ ti⁴t²a³ts²an⁴-nia³ ni⁴jme³-jin² xi³c²oa³sje³je³ya³ yao³-na⁴, to⁴coi³ t²a³ts²e⁴ cjoa⁴?i³nta³-na⁴. **6** Nca⁴ tsa² me³-na³ c²oa³sje³je³ya³ yao³-na⁴, li²coi³ sca¹ coan⁴-na³, nca⁴ c²oa⁴?xian¹ xi³cjoa⁴qui²xi⁴. To⁴nca³ si³c²e¹jna²?nia¹, jme¹-ni³nca³ ni⁴?ya³-jin² xi³ nqui²sa⁴ nta³ si⁴?cja³?ai³tsjen³-si¹ni³ jo³ cjoan³ an³, cao⁴-ni³ tsa² xi³ ve³ ts²an⁴,

a³xo⁴ xi³ nčh[?]oe¹-ni³na³. ⁷ C²oa⁴ cjai¹nca³ to⁴tse³ cjoa⁴ xi³ coan³son²tsen³-na³. To⁴coi³ cjoa⁴-vi⁴ nca³ qui³ts²ai²jin³ yao³-na⁴ jnco³ na³?ya¹, jme¹-ni³ nca³ li²coi³ coan⁴nc²a³con³-si¹nia³ xi³ to⁴ts²a³to³ntjai² choa⁴-le⁴. Je² na³?ya¹-ve⁴ jnco³ cho⁴nta³-le⁴ Satanás xi³ c²oa⁴-s²in² v²e¹-na³, jme¹-ni³ nca³ tsi² coan⁴nc²a³con³-si¹nia³ xi³ to⁴ts²a³to³ntjai² choa⁴-le⁴. ⁸ Xi³ t²a³ts²e⁴ coi³-vi⁴ jan² c²a³ je³tsa³c²e³ts²oa²³-le⁴ Nai³-na¹ nca³ coi⁴tjo³xin²-na³. ⁹ C²oa⁴ je² c²oa⁴qui³tso²-na³: Cji³ma³-ni³li² je² cjoa⁴nta³-na⁴, nca³ je² nca³n[?]ion¹-na⁴ nqui²sa⁴ n[?]ion¹ nta³ ma³tsen³-ni³ cao⁴ cjoa⁴i³nta³-li⁴. To⁴coi³ cao⁴ cjoa⁴tsjao³ to⁴sa³c²oa³sje³je³ya³yao³-na⁴ xi³ t²a³ts²e⁴ cjoa⁴i³nta³-na⁴, jme¹-ni³ nca³ je² nca³n[?]ion¹-le⁴ Cristo s²e⁴jna³jin³-si¹ni³na³. ¹⁰ Xi³ t²a³ts²e⁴ Cristo to⁴coi³ nta³ tjin¹-coan³ cao⁴ cjoa⁴i³nta³-na⁴, cao⁴ nca³ no²cjoa⁴aon³-na³, cao⁴ cjoa⁴ñ[?]ain³, cao⁴ nca³ fi²tjen⁴nqui³ co²ntran⁴-na³, cao⁴ xi³ li² to⁴jo³ xi³ cji³ ñ[?]ain³ ma³-na³. To⁴c²ia⁴-ni³ nca³ i³nta³ an³, c²ia⁴ tjin¹-na³ nca³n[?]ion¹. ¹¹ Je³c²oa⁴-s²in² sca¹ya³-na³ nca³ v²a³sje³je³ya³ yao³-na⁴. Jon² nio¹³ xi³ cjoa⁴n[?]ion¹ qui³n[?]ian²-nao¹³. An³ nia¹³ xi³ tjin¹-ni³ nca³ nta³ ch²a⁴sje³-nao¹³, nca⁴ ni⁴jme³-jin² xi³ nqui²sa⁴ na³nqui³ tsa³ca²te⁴jna³-le⁴ cao⁴-ni³ tsa² je² pa²stro⁴ xi³ n[?]ion¹ nc²a³ v²a³sje³ yao³-le⁴, nta³ tsa² ni⁴jme³-jian²³. ¹² Cjoa⁴qui²xi⁴-ni¹ nca³ je² choa⁴-le⁴ pa²stro⁴ c²oa⁴-s²in² c²oa⁴coan³ ya⁴jin³-le⁴ nca³ jon² cao⁴ nca³yi³je³ cjoa⁴tse³ta³con², cao⁴ choa⁴, cao⁴ cjoa⁴ xi³ tse³, cao⁴ cjoa⁴xcon¹. ¹³ Jo¹-s²in² nqui²sa⁴ to⁴choa³ nta³ tsa³?ya³ta³con²-no³ nca³ jon² cao⁴-ni³ tsa² xi³c²a³ na⁴xi⁴na³nta¹-le⁴ Cristo, tsa² tsi² xi³

to⁴coi³ nca³ ti^{4?}an³-nia³ li²coi³ qui³si³ch[?]a¹ne²-no³.
 Ti⁴cha³t[?]a³-nao¹³ xi³ c[?]oa⁴-s[?]in² ch[?]ao³ qui³s[?]ian³.

Pablo coai⁴con³-le⁴ cho⁴ta⁴ corintios xi³ ma³jan²-ni³c[?]a³

¹⁴ Coe⁴-ni³ nca³ je³ti²jna⁴nta³ nca³ cjo¹con³-no³ xi³ ma³jan²-ni³ c[?]a³, c[?]oa⁴ li²coi³ si³ch[?]a¹ne²-no³, nca³ tsi² tsa² je² tso³jmi²-no³ xi³ va³sje²³, to⁴nca³ jon² nio¹³ xi³ va³sjai²³-no³. Nca⁴ li²coi³ ma³chjen¹ nca³ je² xti³ c[?]oe⁴tjao² t[?]a³ts[?]e⁴ xi³jcha¹-le⁴, to⁴nca³ je² xi³jcha¹-le⁴ c[?]oe⁴tjao² xi³ t[?]a³ts[?]e⁴ xti³.

¹⁵ To⁴nca³ cao⁴ cjoa⁴tsjоа³ si³cje³jian³ nca³n[?]ion¹-na⁴, c[?]oa⁴ ntia³ cjoе⁴jin³ nca³n[?]ion¹-na⁴ t[?]a³ts[?]e⁴ ni⁴ma⁴-no³, nta³ tsa² nqui²sa⁴ tse³ tsjоа³que⁴-no³, c[?]oa⁴ jon² nqui²sa⁴ choa³ tsjоа³cha³-nao¹³.

¹⁶ An³ li²coi³ qui³si³ch[?]a¹ne²-no³, to⁴nca³ jon² vi³xon¹³ nca³ n[?]ion¹ ma²ñna⁴ nca³ an³, nca³ to⁴cjoa⁴ch[?]a²na⁴cha⁴ qui³scoe¹-ni³no³. ¹⁷ A³

tsa³c[?]a³na⁴cha⁴-no³ nca³ jon² cao⁴ jnco³ xi³ ts[?]e⁴ je² xi³ qui³si³ca³sen¹con³-no³. ¹⁸ Tsa³c[?]e³ne²³-le⁴

Tito, c[?]oa⁴ qui³si³ca³sen¹jncoa³ nts[?]e³² cao⁴ je². A³ c[?]oa⁴-s[?]in² tsa³c[?]a³na⁴cha⁴-no³ Tito. A³ tsi² tsa² ti⁴coi³-ni³ cjoa⁴fa³⁷ai³tsjen³ ti³ma³jin³-ni³jin⁴,

c[?]oa⁴ ti⁴coi³-ni³ ntia⁴ ti³ma³yai³⁴-jin⁴. ¹⁹ A³ to⁴jo³ ni²cja³⁷ai³tsjen³-nio¹³ nca³ to⁴ti³no²cjoa⁴ntjai²⁴-jin⁴ yao³-na⁴jin⁴ cao⁴ jon². Nqui³xcon⁴ Ni³na¹ no²cjoai⁴-jin⁴ nca³ ti³yo³coai⁴-jin⁴ Cristo, to⁴nca³ jon² xi³ tsjоа³que⁴-no³, nca³y³je³ no²cjoa⁴-ni³jin⁴ xi³ t[?]a³ts[?]e⁴ nca³ coin⁴nc[?]ao³. ²⁰ Tsa³cjon³-nia¹³

nca³ c[?]ia⁴ nca³ coi³choa³, nca³ sa⁴te¹jin³-no³ jo³ cjoaon³, jo³-s[?]in² nca³ tsi² sa⁴sen¹-na³, c[?]oa⁴ an³ sa⁴te¹jin³-nao¹³ jo³ cjoan³ nca³ tsi² sa⁴sen¹-no³,

tsa² c²oa⁴-s²in² tjin¹ cjoa⁴vi³xcan¹ ya⁴jin³-le⁴ nca³ jon², cao⁴ cjoa⁴xin²ta³con², cjoa⁴jti³, nca³ jao²ya³ ti³yo³, cao⁴ xi³ ch[?]ao³ ?mi²lao⁴³ xi²nquio⁴³, cao⁴ xi³ chja³a²nqui³jnio¹³, cao⁴ cjoa⁴nc²a³ta³con², cao⁴ cjoa⁴si³. ²¹ Tsa³cjon³-nia¹³ c²ia⁴ nca³ coi³cho³-nia³ nca³ Ni³na¹ si⁴ cja³a³jen³-na³ nqui³xcon³ nca³ jon², c²oa⁴ nca³ squi³nta¹³ xi³ t²a³ts²e⁴ xi³ ncjin² xi³ nca³s²a⁴ tsa³jnqui³ je¹, c²oa⁴ nca³ cje³ si¹cja³ai³tsjen³jin³-jin²ni³ xi³ t²a³ts²e⁴ cjoa⁴jnti¹-le⁴, cao⁴ cjoa⁴cha³jnqui³-le⁴, c²oa⁴ cao⁴ cjoa⁴chi⁴nca⁴-le⁴ xi³ qui³s²in³.

13

¹ Je² xi³ ma³jan²-ni³ c²a³ cjo¹con³-no³ nca³ jon². Cao⁴ xi³ jao² a³xo⁴ jan² testigo xi³ tsjoa¹ en¹-le⁴ c²oa⁴-s²in² s²e⁴nta³-ni³ nca³yi³je³ cjoa⁴s²e³nqui³. ²To⁴nqui³-ni³ je³c²oa⁴qui³xian³ nca³s²a⁴, c²oa⁴ nt²ai⁴ nqui²jnco³c²a² c²oa⁴xin³-nca¹nia³. To⁴jo³-s²in² nca³ qui³xin³-le⁴ c²ia⁴ nca³ tsa³ca²te⁴jna³cao⁴-no³ xi³ coan³jao²-ni³ c²a³, c²oa⁴-s²in² nt²ai⁴ nca³ xin²ti²jna⁴, c²oa⁴xin³-le⁴ je² xi³ nca³s²a⁴ tsa³jnqui³ je¹, c²oa⁴ nca³ts²i³ xi³c²a³. Tsa² cjo¹nqui²jnco³c²a²³ li²coi³ si³cha³t²a³-le⁴. ³ Coi³ nca³ me³-no³ nca³ cho¹t²a³-nao¹³ tsa² Cristo nchja⁴jin³-na³. Je² Cristo li²coi³ i³nta³ xi³ t²a³tsaon⁴³, to⁴nca³ tjin¹-le⁴ nca³n²ion¹ xi³ t²a³tsaon⁴³. ⁴ Qui³s²e³t²a³-ni³ cro² to⁴t²a³ts²e⁴ cjoa⁴i³nta³-le⁴, to⁴nca³ to⁴t²a³ts²e⁴ nca³n²ion¹-le⁴ Ni³na¹ ti¹jna³con³-ni³. C²oa⁴-ti⁴ ña¹ c²oa⁴-s²in² i³nta³ cjoan³² cao⁴ je², to⁴nca³ cao⁴ je² coi⁴yo³chon³-nia¹ xi³ t²a³tsaon⁴³ xi³ to⁴t²a³ts²e⁴ nca³n²ion¹-le⁴ Ni³na¹. ⁵ Cho¹t²ao³ yao³-no³ nca³ ti⁴jon²-nio³, tsa² nta³ ti³yo³cao⁴³ xi³ ma³cjain¹-no³. Nta³ cho¹t²ao³

yao³-no³ tsa² nta³ cjoaon³. A³ tsi² nta³ ?ya³xcon³-nio³ yao³-no³ nca³ Jesucristo ti¹jna³jin³ ni⁴ma⁴-no³, to⁴nca³ li²coi³ c⁷oa⁴-s⁷in² ma³ tsa² tsi² nta³ ji²tjo⁴-nio³. ⁶ To⁴nca³ an³ co³ya²³ nca³ jchao⁴³ nca³ jin⁴-jin⁴ nta³ ji²tjo⁴-jin⁴. ⁷ C⁷oa⁴ v⁷e²ts⁷oa³-lai⁴jin⁴ Ni³na¹ nca³ ni⁴jme³-jin² cjoa⁴ xi³ ch⁷ao³ tjin¹ xi³ s⁷iaon⁴³, a³li² coi³-jin² nca³ jin⁴-jin⁴ nta³ cho¹t⁷a³-na³jin⁴, to⁴nca³ jme¹-ni³ nca³ jon² c⁷oa⁴s⁷ian⁴-si¹nio³ je² xi³ nta³ tjin¹, nta³ tsa² jin⁴-jin⁴ xi³ li²coi³ nta³ coi²tjo⁴-jin⁴. ⁸ Nca⁴ ni⁴jme³-jin² xi³ coan⁴-na³jin⁴ co²ntran⁴-le⁴ je² xi³ cjoa⁴qui²xi⁴, to⁴nca³ to⁴je² xi³ coan⁴-na³jin⁴ je² xi³ t⁷a³ts⁷e⁴ cjoa⁴qui²xi⁴. ⁹ To⁴coi³ ma³tsjoa³-ni³na³jin⁴ c⁷ia⁴ nca³ i³ntai³⁴-jin⁴, c⁷oa⁴ c⁷ia⁴ nca³ jon² xi³ tjin¹-no³ nca³n⁷ion¹. Coi³ cjoa⁴ xi³ v⁷e²ts⁷oai³⁴-jin⁴, nca³ ñia³qui³ qui²xi⁴ coaon⁴³. ¹⁰ To⁴coi³ cji³-ni³no³ je²-vi⁴, c⁷ia⁴ nca³ xin² ti²jna⁴, jme¹-ni³ nca³ tsi² ta²ja³jin³ si³cao⁴-si¹ni³no³ c⁷ia⁴ nca³ ya⁴ ti²jna⁴, jo³-s⁷in² je² cjoa⁴te¹xo³ma³ xi³ Nai³-na¹ qui³tsjoa³-na³, nca³ si³quin³nc⁷a³-no³, c⁷oa⁴li²coi³ nca³ si³qui³xo²ya³-no³.

Cjoa⁴ni²ti²nta³ xi³fe³t⁷a³

¹¹ Xi³ to⁴fe³t⁷a³-ni³, nts⁷e³, ca²ta³s⁷e³-no³ cjoa⁴tsjoa³, qui²xi⁴ ca²ta³mao³, ca²ta³s⁷e³-no³ cjoa⁴ni²je³ta³con². To⁴jnco³ tja³cjao³jco³, nch⁷an¹ ca²ta³ma³chon³-no³. C⁷oa⁴ je² Ni³na¹ xi³ si¹qui³njen³nch⁷an¹jin³ ni⁴ma⁴-no³, c⁷oa⁴ xi³ ts⁷e⁴ cjoa⁴tjao²cha³ c⁷oe¹jna³cao⁴-no³ nca³ jon². ¹² Ti⁴ti²ntao³ xi²nquio⁴³ xi³jnco³ cao⁴ xi³c⁷a³ nca³ tsje³ t⁷e²t⁷a³ts⁷oa³-lao⁴³ xi²nquio⁴³. ¹³ Nca³ts⁷i³ cho⁴ta⁴-le⁴ Cristo si¹ti²nta³-no³. ¹⁴ Je² cjoa⁴nta³-le⁴ Nai³-na¹ Jesucristo, c⁷oa⁴ je² cjoa⁴tjao²cha³-le⁴

Ni³na¹ c⁷oa⁴-s⁷in² ca²t⁷e²yo³jin³-no³ nca³ts⁷io³ cjoa⁴-vi⁴, c⁷oa⁴ nca³ ña³tjen⁴ coi⁴yo³cao⁴³ Espíritu Santo.
C⁷oa⁴ ca²ta³ma³.

**Xon⁴-le⁴ ni³na¹ xi³ t?a³ts?e⁴ Jesucristo
New Testament in Mazatec, Huautla
(MX:mau:Mazatec, Huautla)**

copyright © 1960 Wycliffe Bible Translators, Inc.

Language: Mazatec, Huautla

Translation by: Wycliffe Bible Translators, Inc.

Mazateco, Huautla [mau], Mexico

Copyright Information

© 1960, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Huautla

© 1960, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
69c7ee6e-d3c3-563f-a672-6ad58122d8ed